

BON NOBA DI JESUS KRISTU KU MARKUS SKIRBI

Introduson

E libru i “Bon Noba di Jesus Kristu, Fiju di Deus.” I un libru movimentadu, ku mostra Jesus suma Servu di Deus, ativu na tarbaju, ma un omi di puder ku otridadi. Jesus fala kuma el i Fiju di Omi ku ka bin pa i sirbidu, ma pa i sirbi, i da si vida pa liberta manga di jinti (10.45).

I pudi sedu ku Markus skirbi e libru na Roma, oca ki staba la ku Pedru, i obi storia di Jesus na boka di kila.

Jon Batista

(*Mat 3.1-12; Luk 3.1-18; Jon 1.6-8,19-36*)

1 ¹Bon Noba di Jesus Kristu, Fiju di Deus, i kumsa ²suma ku anunsiadur Isaias skirbi na libru, kuma Deus fala:

“N na manda ña servu bu dianti,

ku na kumpu kamiñu pa bo.

³ Algin na grita na lala, i na fala: ‘Bo kumpu kamiñu di Siñor; bo filantal strada.’”

⁴Asin un omi ku comadu Jon i parsi na lala, i na batisa jinti, i na konta elis palabra di Deus, i fala: “Bo ripindi di bo pekadu, bo batisa; Deus ta purda bo pekadu.” ⁵Tudu jinti di tera di Judeia ku jinti di prasa di Jerusalem e ta baiba pa Jon, e konfesa se pekadu; i ta batisa elis na riu Jordon.

⁶Jon ta bistiba ropa di kabelu di kamelu tisidu; i ta mara sintu di kuru na rabada; i ta kume gamfañotis

ku mel. ⁷I ta konta jinti, i fala elis: “Un algin na bin dipus di mi ki mas di ki mi. Ami N ka mersi wunji pa dismanca korda di si sapatu. ⁸Ami na bardadi N na batisa bos ku yagu, ma el i na batisa bos ku Spiritu Santu.”

Jesus batisadu, i tentadu

(*Mat 3.13-17; 4.1-11; Luk 3.21-22; 4.1-13; Jon 1.32-34*)

⁹Na ki tempu Jesus saiba na tabanka di Nazaré na tera di Galilea. Jon batisal na riu Jordon. ¹⁰Oca ki na sai na yagu, i oja seu yabri. Spiritu Santu disi suma pumba, i ria nel. ¹¹Un algin papia di seu, i fala: “Abo i ña Fiju ku N kiri ciu; N ten garandi kontentamentu na bo.”

¹²I ka tarda, Spiritu di Deus lebal pa lala. ¹³I fika la korenta dia, son ku limarias brabu. Satanas na tentalba. Anjus bin sirbil.

Purmeru disipulus di Jesus

(*Mat 4.12-22; Luk 5.1-11*)

¹⁴Jon pudu na kalabus. Dipus, Jesus riba pa Galilea, i konta Bon

1.1: Mat 14.33; Luk 1.35; Jon 1.34; 20.31; At 8.37; 9.20; 2 Kor 1.19 **1.2:** Mal 3.1; Mat 11.10; Luk 7.27
1.3: Is 40.3 **1.4:** Jon 3.23 **1.6:** Sir 11.22 **1.7:** At 13.25
1.8: At 1.5; 11.16; 19.4 **1.8:** At 2.4; 10.45; 1 Kor 12.13
1.11: Kap 9.7; Sal 2.7; Ef 1.6 **1.13:** 1 Re 19.5-7

Noba di Deus, i fala: ¹⁵“Tempu ci-ga ja. Renu di Deus sta ja pertu. Bo ripindi di bo pekadu, bo fia na Bon Noba.”

¹⁶Oca Jesus na yandaba lungu di Mar di Galileia, i oja dus piskadur, Simon ku si ermon André, ku na botaba ridia na mar. ¹⁷I fala elis: “Bo bin no bai; N na fasi bos piskadur di jinti.” ¹⁸E disa janan se ridia, e bai ku el.

¹⁹I bai mas dianti, i oja Tiagu, fi-ju di Zebedeu, ku si ermon Jon. E staba na barku, e na capa se ridia. ²⁰Na ki ora Jesus coma elis. E disa se pape Zebedeu na barku ku si tar-bajaduris, e bai ku Jesus.

Jesus kura un omi ku teneba spiritu mau

(Luk 4.31-37)

²¹E bai pa Kafarnaun. Na dia di diskansu Jesus yentra na kasa di juntamentu, i kumsa na nsina. ²²Jinti fikaba dimiradu ku si nsinamentu, pabia i ka nsina suma pursoris di lei, ma i ta nsina ku tudu sertesa.

²³Un omi ku teneba spiritu mau staba na kasa di juntamentu. I grita, i punta: ²⁴“Ke ku no ten ku bo, Jesus di Nazaré? Bu bin pa kaba ku nos? N sibi kin ki abo; abo i ki algin santu di Deus.” ²⁵Jesus raprindil, i fala: “Kala, bu sai nel.” ²⁶Spiritu mau bulbuli kurpu di omi ku forsa, i grita risu, i sai nel. ²⁷Tudu jinti fika dimiradu tok e na punta nju-tru: “Es i ke? I nsinamentu nobu? E omi ta papia ku otridadi, i ta da ordi te pa spiritus mau; e ta obdisil!”

²⁸Si fama laga, i spaja na tudu tera di Galileia.

Jesus kura manga di duenti

(Mat 8.14-17; Luk 4.38-41)

²⁹Oca ke sai na kasa di juntamentu, e bai pa kasa di Simon ku André. Tiagu ku Jon bai ku elis. ³⁰Mame di minjer di Pedru ditaba ku feбри. Na ki ora e konta Jesus del. ³¹I bai pa el, i pegal na mon, i judal lanta. Feбри disal janan; i kumsa sirbi elis.

³²Di tardi, oca ku sol na kai, e tisi tudu duentis pa Jesus, ku kilis ku teneba dimoni. ³³Tudu jinti di prasa ruma na porta. ³⁴Jesus kura manga di jinti di manga di kolda-di duensa; i tira manga di dimoni na jinti, ma i ka disa dimonius pa e papia, pabia e kunsilba.

Jesus yanda na Galileia

(Luk 4.42-44)

³⁵Parmaña sedu, oca kau suku-ru inda, Jesus lanta, i sai, i bai pa un lugar dingidu fora di tabanka pa fasi orason. ³⁶Simon ku si kumpa-ñeris bai buskal. ³⁷E ojal, e falal: “Tudu jinti na buskau.” ³⁸Jesus fala elis: “No ten ku bai pa utru tabankas ne ladus pa N konta palabra di Deus la tambi, pabia i es ku N bin pa el.” ³⁹I fika i na yanda na tudu Galileia, i konta palabra di Deus na kasas di juntamentu, i tira dimonius na jinti.

1.15: Dan 9.25; Gal 4.4 **1.18:** Kap 10.28 **1.21:** Mat 4.13

1.22: Mat 7.28 **1.24:** Mat 8.29 **1.26:** Kap 9.20

1.34: V 25; Kap 3.11-12 **1.35:** Kap 6.46 **1.38:** Is 61.1

1.39: Mat 4.23

Kura di un omi ku teneba mpincu

(*Mat 8.1-4; Luk 5.12-14*)

⁴⁰Un omi ku teneba mpincu ciga pertu di Jesus, i finka juju si danti, i rogal, i falal: “Si bu misti, bu pуди limpan.” ⁴¹Jesus sinti pena del, i distindi mon, i toka nel, i falal: “N misti. Fika limpu!” ⁴²I kaba papia son, mpincu pirdi nel; omi fika kuradu. ⁴³Oca Jesus na dispidil, i papia risu ku el, ⁴⁴i falal: “Jubi, ka bu konta ningin nada. Bai pa saserdoti, bu mostral bu kurpu, bu da Deus oferta ku Moisés manda, manera ku bu sta ja limpu. Es i ta sirbi proba kuma bu sta kuradu.” ⁴⁵Ma ki omi sai, i kumsa na papia ciu, i spaja noba di kusa ku kontisiba, tok Jesus ka pуди ja yentra na tabanka na uju di jinti. I fika fora na lugar dingidu, ma jinti di tudu parti e ta bai pa el.

Jesus kura un omi ku ka ta yandaba

(*Mat 9.1-8; Luk 5.17-26*)

2¹I pasa puku dias, Jesus riba pa Kafarnaun. Jinti bin sibi kuma i sta na kasa, ²e junta tok lugar ka tenba, nin na baranda. Jesus na kontaba elis palabra di Deus. ³Kuatu omi karga un omi ku duensi tok i ka pudiba bulbuli kurpu, e leba pa Jesus. ⁴Manera ke ka pуди ciga lungu di Jesus pabia di jinti, e diskubri ladu di kankra, e yabri buraku riba di kau ku Jesus staba nel, e rianta kanape ku ki duenti. ⁵Jesus oja se fe, i fala duenti: “Ña fiju, bu pekadu sta ja purdadu.”

⁶Utru pursoris di lei sintaba la; e kumsa na papia dentru di se sintidu, e punta: ⁷“Ke ku manda e omi na papia asin? I na lebsi Deus! Kin ku pуди purda pekadu si i ka Deus son?” ⁸Jesus ntindi janan ki kusa ke na kuda; i punta elis: “Ke ku manda bo na papia asin na bo sintidu? ⁹Kal ki mas lestu: pa fala e omi ku ka pуди bulbuli kurpu kuma si pekadu sta ja purdadu, o pa falal pa i lanta, i toma si kanape, i yanda? ¹⁰Bo na sibi kuma ami, Fiju di omi, N ten puder na tera pa purda pekadu.” I rabida i fala duenti: ¹¹“N na falau, lanta, bu toma bu kanape, bu bai pa kasa.” ¹²I lanta janan, i toma si kanape, i sai. Tudu jinti ojal, e fika dimiradu, e ngaba Deus, e fala: “Nunka no ka oja kusa suma es!”

Jesus coma Levi (Mateus)

(*Mat 9.9-13; Luk 5.27-32*)

¹³Jesus torna bai praia. Manga di jinti bai lungu del; i kumsa na nsina elis. ¹⁴I bai mas danti, i oja Levi, fiju di Alfeu, sintadu na si kau di kobra mpustu. I falal: “Bin no bai.” I lanta, i bai ku el. ¹⁵Oca Jesus ku si disipulus sintaba na mesa na kasa di Levi, manga di kobradur di mpustu ku utru jinti di mau nomi sinta juntu ku elis. Jinti ku na sigil e baiba ciu. ¹⁶Utru pursoris di lei di grupu ku comadu fariseus oja Jesus na kume juntu ku ki jinti; e punta si disipulus: “Ke ku manda i na kume ku kobraduris di mpustu ku jinti di mau nomi?” ¹⁷Jesus obi ki kusa, i fala elis: “Kilis ku san e ka pirsisa di mediku, son kilis ku duensi. Ami N

1.44: Sir 14.3-4,10,21-22 1.45: Kap 7.36

2.8: Sal 139.1-4 2.17: Mat 18.11; 1 Tim 1.15

ka bin coma jinti justu, ma N bin pa coma kilis ku ta fasi pekadu.”

Junjun

(*Mat 9.14-17; Luk 5.33-39*)

¹⁸Oca fariseus ku disipulus di Jon Batista na junjunaba, utru jinti bai pa Jesus, e puntal: “Ke ku manda disipulus di Jon ku di fariseus ta junjuna, ma bu disipulus ka ta junjuna?” ¹⁹Jesus punta elis: “Nta jinti ku kumbidadu kasamenti e pudi junjuna nkuantu noivu sta ku elis? Si noivu sta ku elis e ka pudi junjuna. ²⁰Tempu na ciga ke na tiradu noivu; ki ora e na bin junjuna.

²¹“Ningin ka ta bota rumbu di fazenda nobu na kamisa beju. Si i fasi asin, ki fazenda nobu ta mas rumpi beju; kamisa ta mas dana. ²²Ningin ka ta pui biñu nobu na saku di kuru beju. Si i pui, ora ku biñu fermenta i ta rumpi kuru; biñu ta darma; saku ta dana. Biñu nobu i dibi di pudu son na saku di kuru nobu.”

Lei di dia di diskansu

(*Mat 12.1-8; Luk 6.1-5*)

²³Utru dia di diskansu Jesus na pasa na bulaña. Oca ke na yanda, si disipulus kumsa na rinka garan di arus. ²⁴Fariseus puntal: “Jubi, ke ku manda e na fasi kusa ku lei fala kuma no ka dibi di fasi na dia di diskansu?” ²⁵Jesus punta elis: “Nta bo ka ciga di lei aserka di kusa ku Davi fasi, ocal ku fomi, ku kilis ku staba ku el; e ka teneba nada di kume? ²⁶I yentra na kasa di Deus, na tempu ku Abiatar seduba šef di saserdotis. I kume pon sagrađu, i da

si kumpañeris tambi. Konformi lei, son saserdotis ku pudiba kume ki pon.” ²⁷Jesus torna fala elis: “Deus fasi dia di diskansu pa ben di omi; i ka kumpu omi pabia di dia di diskansu. ²⁸Asin Fiju di omi ta manda, te riba di dia di diskansu.”

Jesus kura un omi ku si mon muri

(*Mat 12.9-14; Luk 6.6-11*)

3¹Jesus torna yentra na kasa di juntamentu. I tenba un omi la ku si mon muri. ²Utru jinti na peraba pa jubi si Jesus na kural na dia di diskansu, pa e pudi akusal. ³Jesus fala omi ku si mon muri: “Lanta, bu bin li na metadi.” ⁴I punta ki jinti: “Lei fala pa no fasi ben na dia di diskansu o pa no fasi mal? pa no salba vida o pa no mata?” E kala. ⁵Jesus jubi elis na roda, ku raiba, ma tambi ku tristesa, manera ke risu korson. I fala omi: “Distindi bu mon.” I distindil; i torna san suma ki utru.

⁶Fariseus sai, e bai junta ku jinti di partidu di Erodis pa bai filanta kuma ke pudi mata Jesus.

Jesus kura jinti lungu di Mar di Galileia

⁷Jesus bai ku si disipulus pa praia. Manga di jinti bai si tras, di Galileia, Judeia, ⁸Jerusalen, Idu-meia, ku utru banda di riu Jordon, ku tera pertu di Tiru ku Sidon. Ki jinti tudu e obi di garandi kusas ku Jesus fasi, e bai pa el. Jinti ciu, ⁹tok Jesus fala si disipulus pa e ranjal

2.23: Lei 23.25 **2.25:** 1 Sam 21.6 **2.26:** Sai 29.32-33; Sir 24.5,9 **3.6:** Kap 12.13; Mat 22.16 **3.7:** Luk 6.17-19

barku pikininu pa e ka pertal dimas. ¹⁰Manera ki kuraba manga di jinti, tudu duentis na pinca ntru pa e pudi ciga e toka nel. ¹¹Kilis ku teneba spiritu mau, si e ojal, e ta kai si dianti, e grita: “Abo i Fiju di Deus!” ¹²I fala elis risu pa ka e konta kin ki el.

Jesus kuji dozi apostolu

(*Mat 10.2-4; 12.22-32; Luk 6.12-16; 11.14-23*)

¹³Jesus subi na monti, i coma kilis ki mistiba. E bai pa el. ¹⁴I tira dozi na se metadi, i coma elis apostolus, pa e sta juntu ku el, pa i pudi manda elis pa e konta palabra di Deus, ¹⁵tambi pa e ten puder pa tira dimoni na jinti. ¹⁶Ali se nomis: Simon ku Jesus da nomi di Pedru, ¹⁷Tiagu ku si ermon Jon, fijus di Zebedeu, ki pui nomi di Boanerjes, ku signifika fijus di turbada; ¹⁸André, Filip, Bartolomeu, Mateus, Tome, Tiagu, fiju di Alfeu, Tadeu, Simon di partidu ku misti independensia, ¹⁹ku Judas Iskariotis, kil ku ntregal mas tardi.

²⁰Jesus yentra na un kasa. Jinti torna junta ciu tok Jesus ku si disipulus ka tenba manera di kume. ²¹Oca si familia obi de kusa, e bai buskal, pabia jinti na fala kuma si kabesa ka sta diritu. ²²Pursoris di lei ku binba di Jerusalem e fala: “Beelzebu ku yentral.” E fala tamb: “Şef di dimonius ta dal puder pa tira dimoni na jinti.” ²³Jesus coma elis, i fasi elis un komparason,

i punta elis: “Kuma ku Satanas pudi tira Satanas fora? ²⁴Si jinti di un renu e dividi entri elis, ki renu ka pudi nguenta. ²⁵Si un familia dividi entri elis, ki familia ka pudi nguenta. ²⁶Nta si Satanas ten divison ku gera na si renansa, i ka pudi nguenta; i ten ku bin kaba. ²⁷Ningin ka pudi yentra na kasa di omi ku ten forsa, pa furta kusa ki tene; son si i mara ki omi purmeru ki pudi furta tudu na si kasa.

²⁸“Na bardadi N na konta bos kuma, Deus i ta purda jinti tudu pekadu, ku tudu palabra mau ke fala kontra el Deus, ²⁹ma kil ku papia mal kontra Spiritu Santu, nunca i ka na purdadu. I na fika ku si pekadu ntidu.” ³⁰Jesus fala asin pabia e na falaba kuma i tene spiritu mau.

Familia di Jesus

(*Mat 12.46-50; Luk 8.19-21*)

³¹Si ermons ku si mame bin ciga, e fika fora, e manda comal. ³²Manga di jinti sinta lungu del. Jinti falal: “Ala bu mame ku bu ermons e sta la fora, e na buskau.” ³³I ruspundi elis, i punta: “Kin ki ña mame ku ña ermons?” ³⁴I jubi pa jinti ku sinta pertu del, i fala: “I esis ku sedu ña mame ku ña ermons. ³⁵Kil ku ta fasi suma ku Deus misti, el ki ña ermon macu, ña ermon femia, ku ña mame.”

Komparason di sumiadur

(*Mat 13.1-23; Luk 8.4-15*)

4¹Utru bias Jesus kumsa na nsina na praia. Manga di jinti junta lungu del tok i kamba na un barku ku staba na mar, i sinta.

3.11: Kap 1.23-25,34; Luk 4.41 3.16: Jon 1.42

3.20: Kap 6.31 3.21: Jon 10.20 3.22: Mat 9.34;

Jon 7.20; 8.48 3.24: Şef 7.22; 1 Sam 14.20

Jinti tudu firma na praia. ²I nsina elis manga di kusa ku komparason. Oca i na nsina elis, i fala: ³“Bo sukuta. Un labradur sai pa bai waga simentera. ⁴Oca ki na wagal, utru kai lungu di kamiñu. Kacus ria e kumel. ⁵Utru kai na pedra, kau ku ka tene reia ciu; i nasi dipresa pabia reia ka fundu. ⁶Sol sai, i kemal; planta seku pabia i ka teneba rais. ⁷Utru kai na metadi di fidida; fidida kirsi, i rodial, i pertal tok i ka pudi padi. ⁸Utru kai na bon terenu, i lanta, i kirsi, i da frutu; utru padi te trinta bias mas di ki kil ku sumiadu; utru da sesenta bias, utru da sen bias.” ⁹I kaba, i fala elis: “Kin ku tene oreja pa obi, pa i sukuta.”

¹⁰Oca ki fika el son, si dozi disipulu, ku utru jinti ku fikaba ku el, e puntal kusa di ki komparason. ¹¹Jesus fala elis: “Abos, Deus misti pa bo kungsi sigridu di si renu, ma jinti di fora e ta obi tudu kusa son ku komparason, ¹²pa e fasi suma Skritura fala:

‘E pudi jubi, ma e ka na rapara; e pudi obi, ma e ka na ntindi.

Si i ka asin, e ta rabida pa

Deus;

i ta purda elis se pekadu.’”

¹³I punta elis: “Bo ka ntindi e komparason? Nta kuma ku bo pudi ntindi tudu utru komparason? ¹⁴Ki sumiadur i ta sumia palabra di Deus. ¹⁵Simentera ku kai lungu di kamiñu signifika kilis ku palabra sumiadu nelis, ma e kaba obil son, Satanas bin tira ki palabra ku sumiadu na se korson. ¹⁶I asin tambu ku kilis ku risibi simentera riba di pedra; e ta obi palabra, e ta risibil

ku kontentamentu, ¹⁷ma e ka tene rais fundu; e ka ta tarda. Si kansera bin, jinti lanta kontra elis pabia di ki palabra, ki ora e ta disvia. ¹⁸Kilis ku risibi palabra na metadi di fidida, e obi palabra, ¹⁹ma e ta kuda ciu na kusas de mundu; rikesa ta ngana elis; e ta misti manga di kusa. Tudu e pensamentu ta perta palabra, i ta tujil padi. ²⁰Kilis ku risibi simentera na terenu bon i kilis ku obi palabra, e setal, e padi frutu; un i padi trinta, utru padi sesenta, utru padi te sen bias.”

Komparason di kanderu

(Luk 8.16-18)

²¹Jesus punta elis: “Nta algin ta bin ku kanderu pa mitil bas di balai o bas di kama? I ka ta pul na un kau altu? ²²I ka ten kusa sukundidu ku ka na sai na lus. Tudu ku fasidu na sigridu i na diskubridu. ²³Kin ku tene oreja pa obi, pa i sukuta.”

²⁴I fala elis tambu: “Bo para sintidu na kil ku bo na obi. Midida ku bo midi ku el, el ku jinti na midi bos ku el; e na buri inda mas pa bos. ²⁵Kil ku tene, i na buridu, ma kil ku ka tene, te ki kusa ki tene i na tiradu el.”

Komparason di simentera

²⁶I torna fala: “Renu di Deus i asin. Un omi waga simentera na

3.27: Is 49.24 **3.28:** Mat 12.31-32 **4.8:** Jon 15.5; Gal 5.22; Kol 1.6 **4.11:** Sal 25.14 **4.11:** 1 Kor 5.12-13; Kol 4.5; 1 Tes 4.12; 1 Tim 3.7 **4.12:** Is 6.9-10; Jon 12.40; At 28.26-27; Rom 11.8 **4.17:** Dit 24.10; Jon 6.66 **4.19:** 1 Kor 10.6; 1 Tim 6.9 **4.21:** Mat 5.15 **4.22:** Mat 10.26; Luk 12.2 **4.23:** V 9; Mat 11.15 **4.24:** Mat 7.2; Luk 6.38 **4.25:** Mat 13.12 **4.26:** Mat 13.24-25

con. ²⁷Konformi ki na durmi di noti, i na lanta di dia, ki simentera na nasi, i kirsi; omi ka sibi kuma ki yanda tok i kirsi. ²⁸I con propi ku ta da frutu; paja ta sai purmeru; dipus i ta preña; na kabantada i ta padi. ²⁹Ora ku frutu burmeju, i ta kumsa kebur, pabia tempu di kebra ciga.”

Komparason di simentera di mostarda

(*Mat 13.31-32; Luk 13.18-21*)

³⁰Jesus torna punta: “Ke ku no pudi fala kuma renu di Deus parsi ku el? Ke ku no pudi komparal ku el? ³¹I parsi simentera di mostarda. I mas pikininu di tudu simentera, ³²ma ora ki sumiadu, i ta kirsi, i ta mas tudu utru planta na orta; i ta larga ramu garandi, tok kacus ta fasi se kasa nel, bas di si sombra.”

³³I fika i na konta jinti palabra ku manga di komparason suma es, konformi e pudi ntindi. ³⁴I ta papiaba ku elis son ku ditus, ma ora ki staba son ku si disipulus i ta splika elis tudu.

Jesus kalma mar

(*Mat 8.23-27; Luk 8.22-25*)

³⁵Na ki dia, oca ku sol na kai, Jesus fala si disipulus: “No kamba pa utru banda.” ³⁶E fika jinti, e leba Jesus na barku ki sintaba nel. Utru barkus bai ku el tambi. ³⁷Turbada garandi lanta, ku bentu; maron na kamba tok barku na inci. ³⁸Jesus na durmiba na popa, ku kabesa riba di turbuseru. E kordal, e puntal: “Mestre, bu ka oja kuma no na muri?” ³⁹I korda, i papia risu

ku bentu, i fala mar: “Kala, bu keta.” Bentu para; mar torna tudu ketu. ⁴⁰I punta elis: “Ke ku manda bo panta asin? Bo ka fiansa na mi inda?” ⁴¹E panta dimas, e punta njutru: “E omi i kin ku te bentu ku mar ta obdisi?”

Kura di un omi ku teneba manga di dimoni

(*Mat 8.28-34; Luk 8.26-39*)

5 ¹E ciga na utru banda di mar, na tera di gadarenu. ²Oca ki ria na barku, un omi ku teneba spiritu mau sai na simiteriu, i bai kontra ku el. ³I ta moraba na simiteriu. Jinti ka pudiba prindil, nin ku korenti, ⁴pabia manga di bias i maradu ku korenti di feru na mon ku pe, ma i ta sapa-sapal na padas. I ka tenba ningin ku pudi ku el. ⁵Di dia ku di noti i ta yanda na monti o na simiteriu, i na grita, i na laña si kurpu ku pedra. ⁶Oca ki oja Jesus di lunju, i kuri pa el, i finka juju si danti, ⁷i grita risu, i punta: “Ke ku N ten ku bo, Jesus, Fiju di Deus ku sta riba di tudu? N pidid danti di Deus, ka bu kastigan.” ⁸I fala asin pabia Jesus na falalba: “Spiritu mau, sai ne omi.” ⁹Dipus, Jesus puntal: “Kuma ku bu nomi?” I ruspundi, i falal: “Ña nomi i Multidon, pabia no ciu.” ¹⁰I roga Jesus, i pidil pa i ka serka elis fora di ki tera.

¹¹I staba la na monti manga di purku ku na ferferi na paja. ¹²Ki spiritus mau pidil, e fala: “Mandanu pa ki purkus pa no yentra nelis.” ¹³Jesus seta. Ki spiritus mau sai na omi, e yentra na purkus ku

seduba kuas dus mil. Elis tudu e kuri, e ciga na un riada, e kai na mar, e foga.

¹⁴Bakiaduris di purku kuri, e bai konta na prasa ku tabankas ke ku pasa. Manga di jinti sai pa jubi ke ku kontisi. ¹⁵E bai nunde Jesus, e oja ki omi ku teneba multidon di spiritu mau i sinta la bistidu, ku bon juisu. E sinti medu. ¹⁶Jinti ku matiba konta elis kusa ku pasa ku ki omi, ku kusa ku pasa ku purku. ¹⁷E pidi Jesus pa i sai na se tera.

¹⁸Oca ku Jesus na mbarka, omi ku teneba dimonius pidil pa i disal pa i bai ku el, ¹⁹ma Jesus ka seta. I falal: “Riba pa bu kasa, nunde bu familia, bu konta elis kusa garandi ku Siñor fasi pa bo, manera ki ten pena di bo.” ²⁰I bai, i kumsa na konta jinti na reżion di Des Prasa ki kusas garandi ku Jesus fasi pa el. Tudu jinti fika dimiradu.

Fiju di Jairu ku minjer ku toka na ropa di Jesus

(Mat 9.18-26; Luk 8.40-56)

²¹Jesus kamba mas pa utru banda di mar. Manga di jinti junta na roda del. Oca i staba na purtu, ²²utru omi bin pa el, ku comadu Jairu. I seduba un di şefis di kasa di juntamentu. I oja Jesus, i lastra si danti, ²³i rogal, i fala: “Ña fiju femia sta kuas pa muri. N na pidiu garandi fabur pa bu bai, bu pui mon riba del, bu kural, pa i puidi san.” ²⁴Jesus bai ku el. Manga di jinti bai juntu ku el, tok e perta.

²⁵I tenba utru minjer ku duensi dozi anu, i ta pirdi sangi. ²⁶I sufriba

ciu na mon di manga di mediku, ma i ka fikaba minjor. I gasta tudu ki teneba, ma i na piora son. ²⁷I obi kil ku jinti na fala di Jesus, i bai si tras, na metadi di jinti, i toka na si ropa, ²⁸pabia i papia na si sintidu, i fala: “Nin si N toka na si ropa son, N na san.” ²⁹Oca i panga nel, sangi para; i sinti si kurpu san janan.

³⁰Na ki ora Jesus sinti puder sai nel, i rabida pa jinti, i punta elis: “Kin ku toka na ña ropa?” ³¹Si disipulus falal: “Bu oja kuma ku jinti na pinca-pinca pa ciga nunde bo; bu na punta gora kin ku toka na bo?” ³²Jesus fika i na jubi-jubi pa sibi kin ku fasil. ³³Minjer gora i sibiba ke ku kontisi; i na tirmi ku medu, i ciga pertu del, i finka juju si danti, i kotal tudu bardadi. ³⁴Jesus falal: “Ña fiju, bu fe kurau. Bai ku pas. Bu sta libri di ki duensa.”

³⁵Antis di i kaba papia, utru jinti ciga di kasa di şef di kasa di juntamentu, e falal: “Bu fiju muri ja. Ka bu kansa Mestre mas.” ³⁶Jesus obi ki palabra, i fala şef: “Ka bu panta; fia son.” ³⁷I ka seta pa utru bai si tras, si i ka Pedru, Tiagu ku Jon, ermon di Tiagu. ³⁸Oca e ciga na kasa di şef di kasa di juntamentu, i oja jinti na turmenta, e na cora, e na grita. ³⁹I yentra, i punta elis: “Ke ku manda bo na turmenta, bo na cora? Bajuda ka muri, i na durmi nan.” ⁴⁰Jinti ril. I tira elis tudu pa fora, i leba pape ku mame di bajuda, ku ki tris ku bin ku el, i yentra nunde ku bajuda dita. ⁴¹I toma mon

5.25: Sir 15.25 5.30: Luk 6.19 5.34: Kap 10.52

5.39: Jon 11.11-13 5.40: At 9.40 5.41: Luk 7.14-15

di bajuda, i falal: “Talita kumi,” ku signifika: “Bajuda, N na fala ku bo; lanta!” ⁴²Bajuda lanta janan, i yanda. I teneba dozi anu. Jinti dimira ciu. ⁴³I fala elis kuma i ka misti pa ningin obi e kusa. I fala elis tamba pa e da bajuda kusa di kume.

Jesus negadu na Nazaré

(*Mat 13.54-58; Luk 4.16-30*)

6¹Jesus sai, i bai pa si tera. Si disipulus bai juntu ku el. ²Oca ku dia di diskansu ciga, i kumsa na nsina na kasa di juntamentu. Manga delis ku obil e fika dimiradu, e punta: “Nunde ki sai ku e kusas? Es i kal jiresa ki dadu? Kuma ki ta fasi e milagris? ³Nta es i ka ki karpinteru, fiju di Maria, ermon di Tiagu, José, Judas ku Simon? Si ermons femia e ka sta li na no metadi tamba?” Asin e ka fika nada kontenti ku el. ⁴Jesus fala elis: “Anunsiadur ta rispitu pa tudu ladu; son na si propi tera, na metadi di si parentis ku na si kasa ki ka ten rispitu.” ⁵I ka pudiba fasi milagris la; i pui mon son riba di utru duentis, i kura elis, ma e puku ba. ⁶I dimira manera ke ka fia nel.

Jesus manda si disipulus

(*Mat 10.5-14; Luk 9.1-6*)

Jesus bai di un tabanka pa utru, i na nsinaba jinti. ⁷I coma si dozi disipulu, i kumsa na manda elis dus. I da elis puder riba di spiritu mau, ⁸i fala elis: “Ka bo leba nada

na bo bias, son manduku. Ka bo leba kumida, nin saku, nin diñeru na bolsu, ⁹nin dus kamisa. Bo kalsa sandalia.” ¹⁰I fala elis tamba: “Kasa ku bo gasija nel, bo fika la te dia ku bo sai na ki tabanka. ¹¹Si jinti di utru tabanka ka risibi bos, e ka misti sukuta bos, ora ku bo na sai la, bo konkoñi puera ku sta na bo pe, pa sinal kontra elis.”

¹²Disipulus bai, e konta jinti, e fala elis pa e ripindi di se pekadu. ¹³E tira fora manga di spiritu mau na jinti, e unta manga di duenti ku azeiti, e kura elis.

Mortu di Jon Batista

(*Mat 14.1-12; Luk 3.19-20; 9.7-9*)

¹⁴Rei Erodis bin obi ki kusa, pabia jinti na papia ciu di Jesus na tudu ladu. Utru jinti fala: “Es i Jon Batista ku lanta di mortu; e ku manda i ten puder pa fasi e milagris.” ¹⁵Utrus fala: “I Elias.” Utrus fala: “I anunsiadur, suma kilis di tempu antigu.” ¹⁶Oca Erodis bin obi ki kusa, i fala: “Es i Jon ku N manda dogola ku lanta di mortu.”

¹⁷Na bardadi Erodis propi mandaba prindi Jon, i mitil na kalabus, pabia di Erodis, minjer di Filip, ermon di Erodis, manera ku Erodis tomalba pa i sedu si minjer. ¹⁸Jon falaba Erodis: “Bu ka ten diritu di sta ku minjer di bu ermon.” ¹⁹Erodis fikaba kontra Jon, i misti matal, ma i ka pudi, ²⁰pabia Erodis sintiba medu del; i sibi kuma Jon i bon omi di Deus, i guardal diritu. Sempri ki papia ku el, i ta fika tarpajadu na si sintidu, ma i gostaba di sukutal na mesmu.

5.43: Kap 7.36; Mat 8.4 6.2: Jon 6.42 6.3: Gal 1.19

6.4: Jon 4.44 6.6: Is 59.16 6.6: Mat 9.35; Luk 13.22

6.7: Mat 10.1 6.9: At 12.8 6.10: Luk 10.7-10

6.11: At 13.51; 18.6 6.13: Luk 10.34; Tia 5.14

6.15: Kap 8.28; Mat 16.14 6.18: Sai 20.14; Sir 18.16

²¹Na fin, Erodias bin oja manera. Oca Erodias fasi anu, i fasi festa pa si garandis, ku sêfis di tropa, ku regulus di Galileia. ²²Fiju femia di Erodias yentra, i baja. Erodias ku kilis ku staba ku el na mesa e kontenti ku bajuda. Rei falal: “Pidin ke ku bu misti, N na dau el.” ²³I jurmenta, i fala: “Tudu kusa ku bu pidin, N na dau, te metadi di ña renu.” ²⁴I sai, i bai punta si mame: “Ke ku N na pidi?” I falal: “Kabesa di Jon Batista.” ²⁵Bajuda yentra dipresa, i kuri pa rei, i falal: “N misti pa bu dan kabesa di Jon Batista gosi gosi na un pratu.” ²⁶Rei fika tristi dimas, ma i ka misti purfial, pabia di juramentu ki fasiba dianti di jinti ku staba ku el na mesa. ²⁷Na ki ora rei manda guarda pa i bai tisil kabesa di Jon. Guarda bai pa kalabus, i sapa kabesa di Jon, ²⁸i tisil na un pratu, i da bajuda. Bajuda da si mame. ²⁹Oca disipulus di Jon obi noba, e bai, e toma si kurpu, e bai nteral.

Jesus da kumida pa 5.000 omi

(*Mat 14.13-21; Luk 9.10-17; Jon 6.1-14*)

³⁰Apostolus riba pa Jesus, e kontal tudu ke fasi, ku kusas ke nsinaba jinti. ³¹Manga di jinti na bai, e na bin, tok Jesus ku si disipulus ka tenba tempu pa kume. Asin Jesus fala elis: “Bo bin no bai na utru kau ku jinti ka sta nel pa bo diskansa un bokadu.” ³²E kamba na un barku, elis son, e bai pa un kau dingidu.

³³Manga di jinti oja elis e na bai, e rapara elis; e sai na tudu tabankas, e kuri, e jumna elis na kau ke na baiba. ³⁴Oca ki disimbarka, Jesus

oja ki garandi multidon, i sinti pena delis, pabia e staba suma karnel ku ka tene bakiadur. I kumsa na nsina elis manga di kusa. ³⁵Manera ki staba ja tardi, si disipulus bin pa el, e falal: “E kau li i dingi; sol na bin kai gosi. ³⁶Dispidi jinti pa e bai pa kasas o pa tabankas mas pertu pa e kumpra pon pa kume.” ³⁷Jesus ruspundi, i fala elis: “Abos propi bo da elis di kume.” E puntal: “Pa no bai, no gasta duzentus mueda di prata pa kumpra pon pa da elis di kume?” ³⁸I punta elis: “Kantu pon ku bo tene? Bo bai jubi.” Dipus ke jubi e falal: “Sinku pon ku dus pis.”

³⁹Jesus fala disipulus pa e pui tudu jinti pa e sinta, grupu grupu, na paja verdi. ⁴⁰E sinta na grupus, utru grupus ku sen, utru grupus ku sinkuenta. ⁴¹Jesus toma ki sinku pon ku dus pis, i yalsa uju pa seu, i fala Deus obrigadu, i kebra pon, i da si disipulus pa e rapati pa jinti. Dipus i rapati ki dus pis entri elis tudu. ⁴²Tudu jinti kume, e far-ta. ⁴³Disipulus junta padas di pon ku pis ku sobra, e inci dozi kufu. ⁴⁴Omis ku kume ki pon seduba kuas sinku mil.

Jesus yanda riba di mar

(*Mat 14.22-33; Jon 6.16-21*)

⁴⁵Na ki ora Jesus pui si disipulus pa e mbarka, e bai dianti pa Betsaida, na utru banda di mar; el i fika pa dispidi jinti. ⁴⁶Oca i kaba dispidi elis, i bai pa montaña pa ora. ⁴⁷Oca

6.21: Kum 40.20 6.22: 1 Re 3.5; Est 5.3,6; 7.2

6.26: Dan 6.14; 2 Kor 7.10 6.31: Kap 3.20

6.37: Num 11.13,22; 2 Re 4.43 6.38: Kap 8.5

sol noti, barku staba na metadi di mar. Jesus fikaba el son na tera. ⁴⁸I oja manera ke na kansa na rema, pabia bentu staba kontra elis. Kuas na ora di purmeru galu i yanda riba di mar tok i ciga pertu delis, i mistiba pasa dianti. ⁴⁹E ojal manera ki na yanda riba di yagu, e kuda kuma i seduba un kasisa, e grita risu. ⁵⁰Elis tudu e ojal, e panta. Na ki ora Jesus papia ku elis, i fala: “Bo ten koražen. I ami; ka bo medi.”

⁵¹I mbarka tambi ku elis. Bentu para. Disipulus kuda ciu, e fika dimiradu, ⁵²pabia e ka ntindiba ki milagri di pon. Se kabesa staba ficadu.

Jesus kura duentis na tera di Jenesaré

(*Mat 14.34-36*)

⁵³Oca e kamba, e bai pa purtu di Jenesaré, e ntranka la. ⁵⁴Oca e disimbarka, jinti rapara Jesus. ⁵⁵E kuri pa tudu ki ladu, e kumsa tisi duentis na kanapes, pa tudu kau ke obi kuma Jesus staba nel. ⁵⁶Tudu kau ki yentraba nel, nin ki na prasa, o na tabanka, o na pontas, e ta tisilba duentis, e ditanda elis na metadi di prasa; e ta pidil pa i disa elis son pa e toka na roda di si kamisa. Tudu kil ku pangaba nel i ta fika kuradu.

Nsinamentu di antigus

(*Mat 15.1-9*)

7 ¹Un dia utru fariseus ku pursoris di lei ku binba di Jerusalen

e junta ku Jesus. ²E rapara kuma utru disipulus di Jesus na kumeba ku mon kontaminadu, suma ke ka fasi sirmonia di se kustumu di laba mon, ³pabia fariseus, ku tudu judeus, e ta guarda kustumu di garandis di antigu. E ka ta kume sin e ka laba mon manga di bias. ⁴Ora ke bin di fera, si e ka laba, e ka ta kume. E ta sigi manga di utru nsinamentu ke risibi, suma manera di laba kopu, ku jaru, ku tižela di kobri, ku kamas.

⁵Ki fariseus ku pursoris di lei e puntal: “Ke ku manda bu disipulus ka ta fasi konformi nsinamentu di jinti antigu, ma e ta kume sin laba mon?”

⁶Jesus ruspundi elis: “Isaias tenba roson oca ki anunsia di bos finjidus, i skirbi kuma Deus fala:

‘E pobu ta ngaban son ku se palabra,
ma se korson sta lunju di mi.

⁷E ta adoran amonton;
e ta nsina jinti mandamentus di omi suma ki di Deus.’

⁸Bo ka liga mandamentu di Deus; bo ta pega nsinamentu di omi.”

⁹I fala elis mas: “Bo ten manera jiru di nega mandamentu di Deus pa bo guarda kustumus di bo garandis di antigu. ¹⁰Moisés fala: ‘Rispita bu pape ku bu mame.’ I fala tambi: ‘Kin ku fala mal kontra si pape o si mame i ten ku matadu.’

¹¹Abos gora bo fala kuma, si un algin ten kualker kusa ki dibi di da si pape o si mame, ma i falal kuma ‘Es i Korban’ (ku sedu oferta pa Siñor), ¹²bo ta disal pa ka i fasi nada pa si

6.52: Kap 8.17 6.56: Mat 9.20; At 19.12 7.6: Is 29.13
7.8: Kol 2.8 7.10: Sai 20.12; 21.17; Dit 20.20; Ef 6.1
7.11: 1 Tim 5.4,8

pape o si mame. ¹³Asin bo ta tira palabra di Deus balur, manera ku bo ta pasanta bo kustumus pa bo fijus. Bo ta fasi manga di utru kusa suma es.”

Kusas ku ta susa jinti

(*Mat 15.10-20*)

¹⁴I torna coma ki multidon di jinti, i fala elis: “Bo obin, abos tudu, bo ntindi. ¹⁵I ka ten nada di fora ku pudi yentra na omi pa i mancal, ma kil ku sai di dentru di omi, el ku ta mancal. [¹⁶Si algin tene oreja pa obi, pa i sukuta.]”

¹⁷Oca ki disa ki jinti, i yentra na kasa, si disipulus puntal di ki ditu. ¹⁸I ruspundi elis: “Asin tambi ku bo sta tapadu, bo ka ta ntindi? Bo ka sibi kuma tudu di fora ku yentra na algin i ka ta pudi mancal? ¹⁹I ka ta yentra na si korson, ma na stomagu; dipus i ta sai pa fora.” Asin Jesus diklara kuma tudu alimentu pudi kumedu.

²⁰I fala mas: “Kusa ku sai di algin, el ku ta mancal, ²¹pabia i di dentru di korson di algin ki ta sai pensamentus mau, ku pekadu seksual, ^afurtu, matansa, ²²dita ku algin ku bu ka kasa ku el, kubisa, malvadesa, nganu, puku borgoña, nveža, kalunia, ronka garandesas, tulesa. ²³Tudu e malis ta sai dentru di algin; i el ku ta mancal.”

Fe di un minjer

(*Mat 15.21-28*)

²⁴Jesus lanta di la, i bai pa ladus di Tiru, i yentra na un kasa; i ka mistiba pa ningin sibi kuma i sta la,

ma i ka pudiba sukundi. ²⁵I staba na ki tera un bajuda ku tene spiritu mau. Si mame obi di Jesus. Na ki ora i bai nunde el, i kai danti di si pe, ²⁶i pidil pa i tira dimoni na si fiju. Ki minjer i ka judeu; i padidu na tera di Fenisia di Siria. ²⁷Jesus falal: “Disa fijus farta purmeru, pabia i ka bon pa toma pon di fijus pa bota pa kacuriñus.”

²⁸Minjer ruspundi, i falal: “Bardadi, Señor, ma tambi kacuriñus bas di mesa ta kuji restus ku fijus ta bota na con.”

²⁹Jesus falal: “Suma ku bu fala asin, bu pudi bai; dimoni sai ja na bu fiju.” ³⁰I bai pa kasa, i oja si fiju ditadu na kama; dimoni saiba ja nel.

Jesus kura un surdu-mudu

³¹Oca ku Jesus riba di ladus di Tiru, i pasa pa Sidon, ku tera di Des Prasa, i bin te na Mar di Galilea. ³²Jinti tisil un omi surdu ku ka pudi papia diritu. E pidil pa i pui mon riba del. ³³Jesus tiral na metadi di ki jinti, i lebal aparti; i mitil dedu na oreja, i kuspi, i tokal na lingua. ³⁴I yalsa uju pa seu, i da folgu fundu, i fala: “Efata,” ku sedu: “Yabri.”

³⁵Si oreja yabri janan, si lingua disingata; i kumsa na papia diritu. ³⁶Jesus fala elis pa ka e konta ningin nada, ma mas ki misti tuji elis, mas e ta konta inda ki noba. ³⁷E dimira ciu, tok e fala: “Es omi ta fasi tudu kusa diritu. I ta fasi te surdu obi, mudu papia.”

7.21: Kum 6.5 ^a**7.21** *Pekadu seksual:* Palabra fornikason signifika relason seksual entri solterus. **7.33:** Kap 8.23; Jon 9.6 **7.34:** Kap 6.41; Jon 11.41; 17.1 **7.34:** Kap 8.12 **7.35:** Is 35.5-6; Mat 11.5 **7.36:** Mat 8.4

Jesus alimenta 4.000 jinti

(Mat 15.29-39)

8 ¹Na ki dias, manga di jinti junta utru bias. E ka teneba nada di kume. Jesus coma si disipulus, i fala elis: ²“N ten pena de jinti, pabia e sta ja tris dia ku mi; nada di kume e ka tene. ³Si N manda elis pa kasa sin kume nada, e na dismaja na kamiñu, pabia utrus bin di lunju.”

⁴Si disipulus puntal: “Nunde ku algin pudi oja pon ku ciga pa da tudu e jinti li na lala?” ⁵Jesus punta elis: “Kantupun ku bo tene?” E falal: “Seti.”

⁶I manda pa ki jinti sinta na con. I toma ki seti pon, i fala Deus obrigadu, i kebra elis, i da si disipulus pa e rapati. Elis e rapati pa tudu ki jinti. ⁷E teneba tamba un bokadu di moño. I fala Deus obrigadu pa elis, i manda pa e rapati elis tamba. ⁸Tudu jinti kume tok e farta. E inci seti balai ku padas ku sobra. ⁹Jinti ku kume seduba kuas kuaru mil. Dipus, Jesus dispidi elis, ¹⁰i kamba janan na barku ku si disipulus, i bai pa ladu di Dalmanuta.

Sinal di seu

(Mat 16.1-4)

¹¹Utru fariseus sai, e kumsa na diskuti ku el. Pa spurmental, e pidil un sinal di seu. ¹²I da folgu fundu dentru del, i punta: “Pa ke ku jinti di aos na pidi un sinal? Na bardadi, N fala bos kuma e jinti e ka na dadu

nin un sinal.” ¹³I disa elis, i torna mbarka, i bai pa utru banda.

Fermentu di fariseus

(Mat 16.5-12)

¹⁴Disipulus diskisiba di leba pon. Na barku e teneba son un pon. ¹⁵Jesus avisa elis, i fala: “Bo toma sintidu, bo libra di fermentu di fariseus ku fermentu di Erodis.”

¹⁶E kumsa na papia entri elis, e fala: “I suma no ka tene pon.”

¹⁷Jesus ntindi tudu, i punta elis: “Ke ku manda bo na miskiña, bo na fala kuma bo ka tene pon? Bo ka rapara, nin bo ka ntindi inda? Bo kabesa sta ficadu? ¹⁸Bo tene uju, bo ka ta oja? Bo tene oreja, bo ka ta obi? Nin bo ka lembra?

¹⁹Oca ku N kebra sinku pon pa rapati sinku mil, kantu kufu di padas ku bo kuji?” E falal: “Dozi.”

²⁰“Oca ku N kebra ki seti pon pa rapati kuaru mil, kantu balai di padas ku bo kuji?” E ruspundil: “Seti balai.” ²¹I punta elis: “Kuma ku bo ka ntindi inda?”

Jesus kura segu di Betsaida

²²I ciga na Betsaida. Jinti lebal un segu, e pidil pa i toka nel. ²³Jesus pega segu na mon, i lebal pa fora di tabanka. Dipus i kuspil na ujus, i pui mon riba del, i puntal: “Bu na oja kualker kusa?” ²⁴I yalsa uju, i fala: “N na oja jinti; e parsi suma pos ku na yanda.” ²⁵Jesus torna pui mon utru bias riba di si ujus. Omi jubi diritu, i fika kuradu, i na ojaba tudu kusa klaru. ²⁶Jesus mandal pa kasa, i falal: “Ka bu yentra na tabanka.”

8.4: Kap 6.37-44 8.11: Mat 12.38; Jon 6.30

8.15: Luk 12.1 8.17: V 21; Kap 6.52; 2 Tim 3.7

8.19: Kap 6.43 8.20: V 8 8.23: Kap 7.33

Pedru diklara kin ki Jesus

(*Mat 16.13-23; Luk 9.18-22; Jon 6.66-69*)

²⁷Jesus bai ku si disipulus pa tabankas di Sesareia di Filip. Na kamiñu i punta elis: “Kin ku jinti ta fala kuma N sedu?” ²⁸E ruspundil: “Utrus ta fala abo i Jon Batista; utrus ta fala abo i Elias; utrus inda ta fala abo i un di anunsiaduris.” ²⁹I punta elis: “Ma abos, kin ku bo fala kuma N sedu?” Pedru ruspundi, i falal: “Abo i Mesias.” ³⁰Jesus da elis ordi pa ka e konta ningin nada del.

Jesus konta kusa di si mortu

³¹I kumsa na nsina elis, i fala kuma Fiju di omi ten ku sufri ciu. Garandis ku šefis di saserdoti ku pursoris di lei na negal. I na matadu. Dipus di tris dia i na lanta di mortu. ³²I konta es klaru pa elis. Pedru lebal na un ladu, elis dus, i kumsa na raprindil. ³³Jesus rabida, i jubi pa si disipulus, i raprindi Pedru, i falal: “Sai ña dianti, Satanas, pabia bu pensamentu i ka bin di Deus, ma i di omi.”

Kada kin dibi di leba si krus

(*Mat 16.24-28; Luk 9.23-27*)

³⁴Dipus i coma jinti tudu, ku si disipulus, i fala elis: “Si algin misti bin ku mi, i ten ku nega si kabesa, i lambu si krus, i sigin. ³⁵Kin ku misti salba si vida i na pirdil, ma kin ku pirdi si vida pa amor di mi ku di Bon Noba i na salbal. ³⁶Ke ku un omi ta purbita si i ngaña mundu ntidu, i pirdi si kabesa propi? ³⁷O ke ku algin pudi da pa torna liberata si alma? ³⁸Kin ku ten borgoña di

mi ku ña palabra, na metadi di jinti mau i infiel ne mundu di aos, Fiju di omi tambi na ten borgoña del, ora ki bin na gloria di si Pape, ku si santu anjus.”

9¹I fala elis mas: “Na bardadi N na konta bos kuma, di kilis ku sta li, utrus ka na muri tok e oja Deus kumsa rena ku puder.”

Jesus torkia parsensa di si gloria

(*Mat 17.1-13; Luk 9.28-36*)

²Dipus di seis dia Jesus toma Pedru, Tiagu ku Jon, i leba elis aparti pa un monti altu. I bai torkia parsensa la se dianti. ³Si ropa bida branku fandan, i na lampra, suma ku nin un labandera na mundu ka pudi brankisil. ⁴Logu e oja Elias ku Moisés na papia ku Jesus. ⁵Pedru rabida i fala Jesus: “Mestre, i bon manera ku no sta li. No ta fasi tris baraka, un pa bo, utru pa Moisés, utru pa Elias.” ⁶Na bardadi, i ka sibiba ke ki dibi di fala, pabia elis e staba ku garandi medu.

⁷Na ki ora i bin un nuven ku kubri elis ku si sombra. E obi un fála ku sai del, i fala: “Es i ña Fiju ku N kiri ciu. Bo sukutal.” ⁸E jubi-jubi na roda, e ka oja mas ningin; Jesus son ku staba ku elis.

⁹Oca ke na riaba na monti, i da elis ordi pa ka e konta ningin ke ke oja, tok Fiju di omi lanta di mortu. ¹⁰E obdisil, ma e na punta ntru ke ku sedu “lanta di mortu”. ¹¹E bai

8.29: Jon 11.27 **8.31:** Mat 16.21 **8.34:** Mat 10.38; Luk 14.26-27 **8.35:** Jon 12.25 **8.38:** Mat 10.32-33; Luk 12.9; Rom 1.16; 2 Tim 1.8; 2.12 **8.38:** Mat 16.27 **9.1:** Mat 16.28 **9.1:** At 2.2; 1 Kor 4.20 **9.3:** Dan 7.9; Apok 1.13-16 **9.7:** Mat 3.17

punta Jesus: “Pabia di ke ku pursoris di lei fala kuma Elias ten ku bin purmeru?” ¹²Jesus ruspundi, i fala elis: “Na bardadi, Elias na bin purmeru, pa pui tudu na ordi. Nta pabia di ke ku Skritura fala di Fiju di omi kuma i na sufri ciu, i na nju-tidu? ¹³N na konta bos kuma Elias bin ja. E fasil tudu ke ke misti, suma ku Skritura fala del.”

Kura di rapas ku tene spiritu mau

(Mat 17.14-21; Luk 9.37-43a)

¹⁴Oca ke ciga nunde ku ki utru disipulus staba, e oja manga di jinti na se roda, ku utru pursoris di lei ku na diskutiba ku elis. ¹⁵Ki jinti kaba oja Jesus son, e fika spantadu, e kuri pa el, e falal manteña. ¹⁶I punta elis: “Ke ku bo na diskuti ku elis?” ¹⁷Un omi na metadi di ki jinti ruspundi, i falal: “Mestre, N tisiu ña fiju ku tene un spiritu mau ku pul i mudu. ¹⁸Ora ki pañal, i ta batil na con tok boka ta sukuma, i ta ñeme dinti; kurpu ta tesu ku el. N pidi bu disipulus pa e tiral ki spiritu, ma e ka pudi.”

¹⁹Jesus fala elis: “Abos i jinti sin fe! Te kal dia ku N na sta ku bos? Te kal tempu ku N ten ku nguenta bos? Bo tisin el.” ²⁰E lebal el. Spiritu kaba oja Jesus son, i sakudi rapas ku forsa. I kai na con, i fika i na rola; sukuma na sai na boka. ²¹Jesus punta pape di rapas: “Kantu tempu ki sta asin?” Pape ruspundil: “Disna di pikininu. ²²Manga di bias spiritu ta batil na fugu o na yagu, pa matal,

ma si bu pudi fasi kualker kusa pa el, ten pena di nos, bu judanu.” ²³Jesus falal: “Si bu fia. Tudu pudi sedu pa kil ku ten fe.” ²⁴Logu pape di mininu grita ku larmas, i fala: “N fia. Burin fe ku na faltan!”

²⁵Jesus oja kuma manga di jinti na junta riba delis. I raprindi spiritu mau, i fala: “Spiritu surdu-mudu, i ami ku mandau, sai nel! Ka bu riba mas pa el.” ²⁶Spiritu grita, i sakudi rapas ku forsa, i sai. Rapas fika suma kin ku muri, tok manga di jinti fala kuma i muri. ²⁷Jesus pegal na mon, i lantandal; i sikidu.

²⁸Oca ku Jesus yentra na kasa, si disipulus puntal aparti: “Ke ku manda no ka pudiba tiral?” ²⁹Jesus ruspundi elis: “E koldadi spiritu ka ta sai di nin un manera, son ku orason [ku junjun].”

Jesus torna fala di si mortu

(Mat 17.22-23; Luk 9.43b-45)

³⁰Jesus ku si disipulus sai di la, e kortela na Galileia. I ka mistiba pa ningin sibi, ³¹pabia i na nsinaba si disipulus, i fala elis: “Fiju di omi na bin ntregadu na mon di omis. E na matal. Tris dia dipus di muri, i na bin lanta di mortu.” ³²Elis e ka ntindiba ki palabras; e medi puntal.

Kin ku na sedu sêf?

(Mat 18.1-6; Luk 9.46-48)

³³I ciga na prasa di Kafarnaun. Oca ki yentra na kasa i punta elis: “Ke ku bo na diskutiba na kamiñu?” ³⁴E kala tudu, pabia na kamiñu e na diskutiba kal delis ku na sedu sêf. ³⁵El i sinta, i coma

9.12: Mat 16.21 9.13: Mat 11.14 9.20: V 26; Kap 1.26
9.23: Kap 11.22-24; Luk 17.5-6 9.31: Mat 17.22-23
9.34: Luk 22.24 9.35: Kap 10.43

ki dozi disipulu, i fala elis: “Si algin misti tene purmeru lugar, i dibi di toma ultimu lugar, i sedu kriadu di tudu jinti.”

³⁶I toma mininu, i pul na se metadi, i barsal, i fala elis: ³⁷“Kil ku risibi un de mininus na ña nomi, i ami ki risibi. Kil ku risibin, i ka ami ki risibi, ma i kil ku mandan.”

Kin ku ka sta kontra nos i sta ku nos

(Luk 9.49-50)

³⁸Jon falal: “Mestre, no oja un omi ku na serka dimonius na jinti na bu nomi. No falal pa ka i fasil, suma i ka di no grupu.” ³⁹Jesus ruspundi: “Ka bo tujil, pabia ningin ka pudi fasi milagri na ña nomi, dipus i torna fala mal di mi. ⁴⁰Kin ku ka sta kontra nos i sta ku nos. ⁴¹N na konta bos bardadi, kualker algin ku da bos un kopu di yagu pa bibi pabia bo sedu di Kristu, di nin un manera i ka na pirdi si pagamentu.

Tentason pa fasi pekadu

(Mat 18.7-10; Luk 17.1-2)

⁴²“Tudu kil ku fasi un de pikininus ku fia na mi pa i kai na pekadu, i minjor pa i maradu un pedra garandi di muiñu na garganti, i botadu na mar. ⁴³⁻⁴⁴Si bu mon pou pa bu peka, kortal. I mas minjor pa bu yentra na vida ku falta di un mon di ki bu bai pa nfernu ku dus mon, pa fugu ku nunca ka ta paga. ^a ⁴⁵⁻⁴⁶O si bu pe pou pa bu peka, kortal. I mas minjor pa bu yentra na vida ku falta di un pe, di ki bu tene dus pe, bu botadu na nfernu, na

fugu ku nunca ka ta paga. ^b ⁴⁷O si bu uju pou pa bu peka, rinkel. I mas minjor bu yentra na renu di Deus ku un uju son, di ki bu tene dus uju, bu botadu na nfernu, ⁴⁸nunde ku se bicu ka ta muri, fugu nunca ka ta paga. ⁴⁹Kada un na tempradu ku fugu, suma ku sal ta tempru karni di sakrifisiu. ⁵⁰Sal i bon, ma si i pirdi si gustu, ku ke ku bo na pul mas pa i salga? Bo tene sal na bo vida, pa bo sta ku ntru na pas.”

Kaba-kasamenti

(Mat 19.1-12)

10 ¹Jesus sai di la, i bai pa ladu di Judeia, i kamba riu Jordon. Jinti junta utru bias na si roda. I torna na nsina elis, suma si kustumu. ²Utru fariseus bai pa el pa spurmental, e puntal: “Lei ta disa pa un omi kaba ku si minjer?” ³Jesus ruspundi elis, i punta: “Ke ku Moisés fala bos na lei?” ⁴E ruspundil: “Moisés seta pa un omi skirbi karta di kaba-kasamenti, i dispidi si minjer.”

⁵Jesus ruspundi elis, i fala: “Moisés skirbi ki mandamentu pa bos pabia di duresa di bo korson, ⁶ma na kumsada, oca Deus na kumpu mundu, i kumpu macu ku femia. ⁷Pabia di kila, omi ta disa si pape ku si mame pa i bai junta ku si minjer; ⁸elis dus e ta sedu un kurpu

9.36: Kap 10.16 **9.37:** Mat 10.40 **9.38:** Num 11.28

9.40: Mat 12.30 **9.41:** Mat 10.42 **9.43:** Lei 13.6-9;

Mat 5.29-30 ^a **9.43** paga: Utru manuskirtus: paga, 44 nunde ku bicu ka ta muri, fugu ka ta paga.

^b **9.45** paga: Utru manuskirtus: paga, 46 nunde ku bicu ka ta muri, fugu ka ta paga. **9.49:** Sir 2.13; Ez 43.24

9.50: Mat 5.13; Luk 14.34; 2 Kor 13.11; Kol 4.6

10.1: Jon 10.40 **10.4:** Lei 24.1 **10.6:** Kum 1.27; 5.2

10.7: Kum 2.24; Ef 5.31 **10.8:** 1 Kor 6.16

son. Asin e ka sedu mas dus, ma un kurpu son. ⁹E ku manda kil ku Deus junta, omi ka dibi di rapatil.”

¹⁰Oca ke bai kasa, si disipulus torna puntal ki kusa. ¹¹I fala elis: “Kin ku dispidi si minjer, i kasa ku utru, i na fasi adulteriu kontra kil ki dispidi. ¹²Si i minjer ku nega tambi si omi, i kasa ku utru, i na fasi adulteriu.”

Jesus ku mininus

(*Mat 19.13-15; Luk 18.15-17*)

¹³Utru jinti na tisiba mininus pa Jesus toka elis, ma disipulus jusia ku elis. ¹⁴Oca ku Jesus rapara ke ku na pasa, i fika ku kasabi, i fala elis: “Bo disa mininus bin pa mi. Ka bo tuji elis, pabia Deus ta rena riba di jinti suma elis. ¹⁵N na konta bos bardadi kuma, kil ku ka seta renu di Deus suma mininu, di nin un manera i ka na yentra nel.”

¹⁶I barsa elis, i pui si mon riba di kada un, i ora pa elis.

Un riku ku na buska vida ku ka ta kaba

(*Mat 19.16-30; Luk 18.18-30*)

¹⁷Oca Jesus sai, i pega kamiñu pa bai, un omi kuri pa el, i finka juju si dianti, i puntal: “Bon Mestre, ke ku N dibi di fasi pa ngaña vida ku ka ta kaba?” ¹⁸Jesus puntal: “Pa ke ku bu na coman bon? Ningin i ka bon; Deus son ki bon. ¹⁹Bu kungsi

mandamentus: ‘Ka bu mata; ka bu dita ku algin ku bu ka kasa ku el; ka bu furta; ka bu lantanda falsu tustumuñu; ka bu nturja; rispita bu pape ku bu mame.’”

²⁰Omi ruspundi, i falal: “Mestre, N guarda e kusas tudu disna di pikininu.” ²¹Jesus finkal uju, i sinti amor pa el, i falal: “Un kusa son ku faltau. Bai, bu bindi tudu ku bu tene, bu da ki diñeru pa pobris, bu ta tene rikesa na seu. Dipus, bu ta bin, bu sigin.” ²²Oca ku omi obi ki palabra, si rostu rabida, i bai tristi, pabia i teneba manga di rikesa.

²³Jesus jubi pa si disipulus na si roda, i fala elis: “I kansadu dimas pa rikus yentra na renu di Deus!” ²⁴Si disipulus fika dimiradu ku ki palabra. Jesus torna fala elis: “Ña fijus, i kansadu dimas pa [kilis ku fiansa na rikesa] yentra na renu di Deus! ²⁵I mas lestu pa un kamelu pasa na koba di guja te pa un riku seta pa Deus rena riba del.”

²⁶Ku e palabra disipulus fika mas dimiradu inda, e punta ntru: “De manera li, kin ku pudi salba?” ²⁷Jesus finka uju nelis, i ruspundi: “Omi ka pudi fasil, ma i ka kansadu pa Deus, pabia Deus pudi fasi tudu kusa.”

²⁸Pedru rabida i falal: “Jubi, anos no disa tudu pa yanda ku bo.” ²⁹Jesus ruspundi i fala elis: “N na konta bos bardadi kuma, i ka ten ningin ku disa si kasa, o ermons macu o femia, o mame o pape, o fijus, o bu-lañas, pabia di mi ku di Bon Noba, ³⁰ku ka na risibi sen bias mas ciu ne tempu li, ku kasas, ermons macu ku femia, mames, ku fijus, ku

10.9: Mal 2.15-16; 1 Kor 7.11-13 **10.11:** Mat 5.32; Luk 16.18; Rom 7.3; 1 Kor 7.10-11 **10.15:** Mat 18.3; 1 Kor 14.20; 1 Ped 2.2 **10.19:** Sai 20.12-17; Rom 13.9 **10.21:** Mat 6.19-21; Luk 12.21 **10.24:** Jo 31.24; 52.7; 62.10; 1 Tim 6.17 **10.27:** Jer 32.17; Luk 1.37 **10.30:** 2 Kron 25.9

bulañas, tambi ku pirsigison; na tempu ku na bin i na risibi vida ku ka ta kaba. ³¹Manga di kilis ku sta dianti e na fika tras. Kilis di tras e na pasa dianti.”

Jesus torna fala kusa di si mortu

(Mat 20.17-19; Luk 18.31-34)

³²E staba na kamiñu pa bai Jerusalem. Jesus na baiba se dianti. Disipulus na kudaba ciu; utru jinti ku na binba se tras e staba ku medu. Jesus torna coma ki dozi aparti, i kumsa na konta elis ke ku na bin sedu ku el. ³³I fala elis: “Bo sukuta. No na bai Jerusalem nunde ku Fiju di omi na ntregadu pa sêfis di saserdoti, ku pursoris di lei. E na bai kondenal pa mortu, e na ntregal na mon di jinti ku ka sedu judeu. ³⁴Elis e na fasil trosa, e na kuspil, e sutal, e matal, ma, dipus di tris dia, i na lanta di mortu.”

Kusa ku Tiagu ku Jon pidi

(Mat 20.20-28)

³⁵Tiagu ku Jon, fijus di Zebedeu, e bai pa Jesus, e falal: “Mestre, i ten un kusa ku no misti pidu pa bu fasinu.” ³⁶Jesus punta elis: “Ke ku bo misti pa N fasi bos?” ³⁷E falal: “Ora ku bu sinta na bu renu di gloria, pa bu disanu sinta, un na bu mon direita, utru na mon skerda.” ³⁸Jesus fala elis: “Bo ka sibi nin ke ku bo na pidi. Nta bo pudi bibi na kopu ku N na bibi nel, o bo pudi batisadu na manera ku N na batisadu?” ³⁹E ruspondil: “No pudi.” Jesus fala elis: “Na bardadi, bo na bibi na kopu ku N ten ku bibi nel, bo na batisadu

na manera ku N ten ku batisadu, ⁴⁰ma sinta na ña mon direita o na ña mon skerda, i ka ami ku ten diritu di dal. E lugar i pa kilis ki sta markadu pa elis.”

⁴¹Oca ku ki des obi e kombersa, e paña raiba di Tiagu ku Jon. ⁴²Jesus coma elis pertu del, i fala elis: “Suma ku bo sibi, jinti ku rikuñisidu suma gubernaduris di jintius e ten forsa nelis; se sêfis ten garandi otridadi riba delis, ⁴³ma na bo metadi i ka pudi sedu asin; kil ku misti sedu garandi na bos, el i na sedu bo kriadu. ⁴⁴Kil ku misti sedu purmeru na bos, i dibi di sedu katibu di tudu. ⁴⁵Fiju di omi propi ka bin pa i sirbidu, ma pa i sirbi, i da si vida pa liberta manga di jinti.”

Jesus kura Bartimeu

(Mat 20.29-34; Luk 18.35-43)

⁴⁶E ciga Jerikó. Oca ku Jesus na sai di prasa ku si disipulus, ku manga di jinti, i staba un segu comadu Bartimeu, fiju di Timeu, ku na pidi simola, sintadu na roda di kamiñu. ⁴⁷Oca ki obi kuma i sedu Jesus di Nazaré, i kumsa na grita: “Jesus, Fiju di Davi! Ten pena di mi!” ⁴⁸Manga di jinti na jusia ku el pa i kala, ma el i na gritaba inda mas: “Fiju di Davi! Ten pena di mi!” ⁴⁹Jesus para, i fala elis pa e comal. E bai comal, e falal: “Ten koražen; lanta, i na comau.” ⁵⁰Segu ferca si kapa, i jukuta dipresa, i bai pa Jesus. ⁵¹Jesus puntal: “Ke ku bu misti pa N

10.31: Mat 20.16; Luk 13.30 **10.32:** Kap 8.31; 9.31; Mat 16.21 **10.42:** Luk 22.25-26 **10.45:** Jon 13.14; Fil 2.7 **10.45:** 1 Tim 2.6; Titu 2.14

fasiu?” Segu falal: “Mestre, N misti torna oja.” ⁵²Jesus falal: “Bai, bu fe kurau.” Na ki ora propi Bartimeu oja; i pega kamiñu tras di Jesus.

Jesus yentra na Jerusalem

(*Mat 21.1-11; Luk 19.28-40; Jon 12.12-19*)

11 ¹Oca ke na pertu Jerusalem ku Betfajé ku Betânia, lungu di monti di Olivera, Jesus manda dus di si disipulus, ²i fala elis: “Bo bai na tabanka ku sta bo danti. Ora ku bo yentra la, bo na oja un fiju di buru maradu, ku ningin ka monta nel in-da. Bo ta dismancal, bo tisin el. ³Si algin punta bos pa ke ku manda bo na fasi asin, bo ta falal kuma i Siñor ku mistil, ma i na torna ribantal gosi.”

⁴E bai, e oja burusiñu la fora na rua, maradu na ladu di porton. Oca ke na dismancal, ⁵utru jinti ku staba la punta elis: “Ke ku bo na fasi, ku bo na dismanca burusiñu?” ⁶E ruspundi suma ku Jesus mandaba elis; e disa elis pa e lebal.

⁷E leba burusiñu pa Jesus; e ditanda se mantas riba del. Jesus monta nel. ⁸Manga di jinti tambi distindi se manta na kamiñu; utrus na korta ramus na matu, e distindi na con. ⁹Kilis ku bai danti ku kilis ku na binba tras del e na gritaba: “Osana! Kil ku bin na nomi di Siñor i mersi ngabadu. ¹⁰Bensuadu i renu ku na bin, renu di no pape Davi. Osana pa Deus na seu!”

¹¹Jesus ciga na Jerusalem, i yentra na kasa di Deus, i jubi tudu na roda

ma, suma ki seduba ja tardi, i sai, i bai pa Betânia ku si dozi disipulu.

Figera ku ka padi

(*Mat 21.18-19*)

¹²Na utru dia, oca ke sai di Betânia, Jesus teneba fomi. ¹³I oja un figera di lunju ku teneba pajas. I bai jubi si i ta ojaba fruta nel. Oca ki ciga pertu, i ka oja nada, son fojas, pabia i ka seduba tempu di i padi. ¹⁴Jesus fala figera: “Nunka mas ningin ka na kume bu fruta.” Si disipulus obi ki palabra.

Jesus na kasa di Deus

(*Mat 21.12-17; Luk 19.45-48; Jon 2.13-16*)

¹⁵E ciga na Jerusalem; Jesus yentra na kasa di Deus, i kumsa na serka kilis ku na bindi, e na kumpra kusas la. I durba mesas di torkiaduris di diñeru, ku asentus di bindiduris di pumba. ¹⁶I ka seta pa ningin karga kusa pa pasa ku el na kasa di Deus. ¹⁷I nsina elis, i punta: “Nta Deus ka fala na Skritura kuma si kasa na comadu kasa di orason pa jinti di tudu rasa? Ma abos bo fasil kau ku ladron ta sukundi nel.”

¹⁸Êfifis di saserdoti ku pursoris di lei, oca ke obi e kusa, e na buskaba manera di matal. E tenba medu del, pabia tudu jinti ta dimiraba ku si nsinamentu.

¹⁹Oca sol na kai, Jesus ku si disipulus e sai di prasa.

Lison di figera

(*Mat 21.20-22*)

²⁰Na utru dia, parmaña sedu, e pasa, e oja ki figera seku te na rais.

10.52: Mat 9.22 11.7: Zak 9.9 11.9: Sal 118.26

11.10: Sal 148.1 11.17: Is 56.7; Jer 7.11

11.18: Mat 21.45-46 11.18: Mat 7.28

²¹Pedru lembra di ke ku pasaba, i fala Jesus: “Mestre, jubi ki figera ku bu maldisua, i seku.”

²²Jesus ruspundi, i fala elis: “Bo ten fe na Deus, ²³pabia N na konta bos bardadi kuma, kualker algin ku fala e monti li pa i lanta, i kai na mar, i ka duvida na si korson, ma i fia kuma kil ki fala i na fasidu, asin ki na sedu pa el. ²⁴E ku manda N na fala bos kuma, tudu ku bo pidi na orason, bo fia kuma bo risibil ja; bo ta tenel. ²⁵Ora ku bo na ora, si bo tene kualker kusa kontra algin, bo purdal, pa bo Pape ku sta na seu purda bos tambu kusas mau ku bo fasi. [²⁶Si bo ka purda, tambu bo Pape na seu ka na purda bos kusas mau ku bo fasi.]”

Batizmu di Jon

(*Mat 21.23-27; Luk 20.1-8*)

²⁷E bai utru bias pa Jerusalem. Jesus na yandaba na kasa di Deus. Sefis di saserdoti, ku pursoris di lei ku garandis, e bai pertu del, ²⁸e puntal: “Kal diritu ku bu ten pa fasi e kusas? Kin ku dau otridadi pa fasil?” ²⁹Jesus ruspundi elis: “N na punta bos un kusa. Si bo dan rasposta, N ta konta bos kal otridadi ku N ten pa fasi e kusas. ³⁰Bo kontan de, Jon ta batisaba ku otridadi di Deus o di omis?”

³¹E kumsa na diskuti entri elis, e fala: “Si no falal kuma i di Deus, i na puntanu ke ku manda no ka fia na palabra di Jon. ³²Pa no fala i di omi?” Ma e tenba medu di jinti, pabia tudu pobu e oja kuma Jon i seduba anunsiadur na bardadi. ³³E

ku manda e fala Jesus kuma e ka sibi. Jesus ruspundi, i fala elis: “Nin ami tambu N ka na konta bos ku kal otridadi ku N ta fasi e kusas.”

Komparason di labraduris mau

(*Mat 21.33-46; Luk 20.9-18*)

12 ¹Jesus kumsa na fala ku pobu pa komparason, i konta elis e storia: “Un omi taja un orta, i pui pe di uva la, i koba un koba pa ba ta masa uva, i kumpu kasa altu pa bisiadur. Dipus, i renda labraduris ki orta, i bai bias na utru tera. ²Oca ku tempu ciga di korta uva, i manda un kriadu pa labraduris pa i bai toma si parti di fruta. ³Kilas pañal, e sutal, e mandal mon limpu. ⁴I torna manda elis utru kriadu. E molostal na kabesa, e pasantal borgoña. ⁵I torna manda elis utru kriadu; e matal. Manga delis ki manda; e molosta utrus, e mata utrus. ⁶I teneba inda si propi fiju ki ama. Na fin i mandal pa labraduris, i fala: ‘N fia kuma e na rispitaña fiju.’ ⁷Ma labraduris fala ntruu: ‘Es ku na yarda. Bo bin, no matal; yardansa ta sedu di nos.’ ⁸E pegal, e matal, e bota si kurpu fora di orta.

⁹“Ke ku dunu di orta na bin fasi? I na bin kaba ku ki labraduris, i na ntrega orta pa utrus. ¹⁰Sertamenti bo ciga di lei e Skritura ku fala:

‘Pedra ku pedrerus nega
i bin sedu purmeru pedra di
kantu.

11.23: Mat 17.20; Luk 17.6 **11.24:** Mat 7.7; Luk 11.9; Jon 14.13; 15.7; 16.24; Tia 1.5; 5.15-18; 1 Jon 3.22

11.25: Mat 6.14; Kol 3.13 **11.26:** Mat 18.35

11.32: Kap 6.20; Mat 14.5 **12.10:** Sal 118.22-23

¹¹ Es i kusa ku Siñor fasi, ku no oja, no dimira.’ ”

¹² Ki garandis di judeu na buskaba manera di prindi Jesus, pabia e ntindi kuma ki komparason i seduba kontra elis, ma e medi jinti, e disal, e bai se kamiñu.

Mpustu

(*Mat 22.15-22; Luk 20.20-26*)

¹³ E manda utru fariseus ku jinti di partidu di Erodis pa e pañal na kualker palabra. ¹⁴ Oca ke ciga, e falal: “Mestre, no sibi kuma bu ta konta bardadi, bu ka ta bari ningin paja. Bu ka ta jubi pa rostu di ningin, ma bu ta nsina son bardadi di kamiñu di Deus. Konformi no lei, no dibi di paga mpustu pa rei garandi o nau? Pa no da o nau?”

¹⁵ Jesus ntindi se finjimentu, i punta elis: “Pa ke ku bo na buska pañan? Bo tisin mueda pa N jubil.”

¹⁶ E tisil un son. I punta elis: “Rostu di kin ku sta li, ku kal nomi?” E falal: “Di rei garandi.” ¹⁷ Jesus fala elis: “Bo da rei kil ki di rei; bo da Deus kil ki di Deus.” E fika dimiradu ku el.

Saduseus ku resureison di mortu

(*Mat 22.23-33; Luk 20.27-40*)

¹⁸ Saduseus, ku fala kuma lanta di mortu ka ten, un dia e bai pa Jesus pa fasil purgunta, e falal: ¹⁹ “Mestre, Moisés disanu un lei skritu ku fala kuma, si un omi muri, i disa minjer

sin fiju, si ermon dibi di kasa ku ki viuva, pa e pudi tene fiju ku na kontadu suma fiju di ki ermon ku muri. ²⁰ I tenba seti ermon. Purmeru kasa, i muri, i ka disa fiju. ²¹ Sugundu kasa ku ki viuva, i muri tambi sin disa fiju. Mesmu kusa bin sedu ku terseru. ²² Asin ke bai tok e ciga na seti. Nin un son ka disa fiju. Dipus di tudu, minjer muri tambi. ²³ Ora ku mortus lanta na dia di resureison, minjer, di kal delis ki na sedu? Pabia tudu seti ermon kasal.”

²⁴ Jesus ruspundi elis: “Bo stanaganadu dimas. Bo sibi pabia di ke? Bo ka kungsi Skrituras nin puder di Deus. ²⁵ Ora ke lanta di mortu, omi ku minjer ka na kasa; e na sta suma anjus na seu. ²⁶ Kusa di mortus lanta, bo ka lei na libru di Moisés nunde ku Deus papia ku el na ki arvurisiñu ku na yardi, i falal: ‘Ami i Deus di Abraon, Deus di Isak, Deus di Jakó’? ²⁷ El i ka Deus di mortus, ma Deus di bibus. Bo sta na garandi eru.”

Mandamentu mas garandi

(*Mat 22.34-40; Luk 10.25-28*)

²⁸ Un pursor di lei ku obiba ki kombersa i oja kuma Jesus ruspundi elis diritu; i bai pertu del, i puntal: “Kal ki mandamentu mas garandi di tudu?”

²⁹ Jesus ruspundil: “Mas garandi i es: ‘Israel, sukuta! Siñor no Deus, i el son ki Siñor. ³⁰ Ama Siñor bu Deus ku tudu bu korson, tudu bu alma, tudu bu ntindimentu, ku tudu bu forsa.’

³¹ Sugundu i es: ‘Ama bu kumpañer suma bo propi.’ I ka ten nin un mandamentu mas garandi di ki esis.”

12.12: Kap 11.18; Jon 7.30, 44 **12.13:** Luk 11.54

12.18: At 23.8 **12.19:** Lei 25.5-6 **12.25:** 1 Kor 15.47-52;

1 Jon 3.2 **12.26:** Sai 3.6,16 **12.29:** Lei 6.4-5

12.31: Sir 19.18; Mat 19.19

³²Pursor di lei falal: “Mestre, bu papia diritu. I bardadi ku bu fala kuma Deus i un son; fora del i ka ten utru. ³³Pa amal ku tudu no korson, tudu no ntindimentu ku tudu no forsa, pa ama tambi no kumpañer suma nos propi, i mas di ki tudu limarias ku no ta kema pa sakrifisiu.”

³⁴Jesus nota kuma i ruspundi ku jiresa, i falal: “Bu ka sta lunju di re-nu di Deus.”

Dipus de palabra ningin ka osa puntal mas nada.

Kristu, Fiju di Davi

(*Mat 22.41-46; Luk 20.41-44*)

³⁵Oca Jesus na nsina na kasa di Deus, i punta elis: “Ke ku manda pursoris di lei ta fala kuma Kristu i fiju di Davi? ³⁶Spiritu Santu pui Davi propi pa i fala:

‘Siñor fala ña Siñor:

“Sinta na ña direita,

tok N pui bu inimigus suma tapeti

pa bu diskansa pe nel.”’ ³⁷Si

Davi propi comal Siñor,

kuma ki pudi sedu si fiju tambi?”

Avisu kontra pursoris di lei

(*Mat 23.1-36; Luk 11.37-54; 20.45-47*)

Manga di jinti ku staba la na sukutal ku kontentamentu. ³⁸Oca i na nsina elis, i fala: “Bo toma sintidu ku pursoris di lei; e gosta di pasia ku ropa kumpridu; e ta misti pa jinti fala elis manteña ku rispitu na prasa. ³⁹E ta sinta na purmeru lugar na kasas di juntamentu, ku minjor lugar na festas. ⁴⁰E ta splora

kasas di viuvas, nkuantu e na fasi orason kumpridu di finjimentu. E na risibi kastigu mas garandi.”

Oferta di viuva

(*Luk 21.1-4*)

⁴¹Oca Jesus sinta na kasa di Deus, pertu di kaşa di oferta, i na jubi kuma ku jinti na puiba diñeru na kaşa. Manga di jinti riku e na puiba ciu. ⁴²I bin un minjer viuva pobri, i pui dus mueda pikininu ku teneba puku balur. ⁴³Jesus coma si disipulus, i fala elis: “N na konta bos bardadi kuma, e viuva pobri i pui mas ciu na kaşa di ki tudu jinti, ⁴⁴pabia tudu na pui kil ke sopra, ma es, na si koitadesa, i pui tudu ki teneba, kil mesmu ki na gastaba pa kume.”

Jesus fala kuma kasa di Deus na bin batidu

(*Mat 24.1-2; Luk 21.5-6*)

13 ¹Oca Jesus na sai na kasa di Deus, un di si disipulus falal: “Mestre, jubi e pedras garandi ku e kasas bonitu!” ²Jesus ruspundi, i falal: “Bu oja e kasas garandi? Nin pedra ka na fika riba di ñutru ku ka na batidu.”

Sufrimentu ku pirsigison

(*Mat 24.3-14; Luk 21.7-19*)

³Oca i sinta na monti di Olivera, dianti di kasa di Deus, Pedru, Tiagu, Jon ku André bai pa el, e puntal aparti, ⁴e falal: “Kontanu kal tempu

12.32: Lei 4.39; Is 45.6,14; 46.9; 1 Kor 8.4

12.33: 1 Sam 15.22; Os 6.6; Mik 6.6-8 **12.34:** Mat 22.46

12.36: Sal 110.1 **12.41:** 2 Re 12.9 **12.44:** 1 Re 17.10-15;

2 Kor 8.2,12 **13.2:** Luk 19.44

ku e kusas na kontisi. Kal ki sinal ku na mostra kuma tempu ciga pa tudu e kusas kontisi?”

⁵Jesus fala elis: “Bo toma sintidu pa ka ningin ngana bos. ⁶Manga di jinti na bin na ña nomi, e na fala kuma elis i Kristu. E na ngana manga di jinti. ⁷Ora ku bo obi baruju di gera pertu, ku noba di gera lunju, ka bo panta, pabia e kusas ten ku kontisi, ma inda i ka fin. ⁸Nason ten ku lanta kontra nason, renu kontra renu. Con na tirmi na manga di parti; fomi na ten. E kusas na parsi suma purmeru dur di partu.

⁹“Abos propi, bo toma sintidu. Pabia di mi bo na ntregadu na justisa; bo na sutadu na kasas di juntamentu; tambi bo na lebadu dianti di gubernaduris ku reis, pa bo pudi konta di mi se dianti. ¹⁰Ma antis di kila, i pirsis pa Bon Noba kontadu pa tudu rasa. ¹¹Ora ku bo prindidu, bo ntregadu, ka bo jumna bo fika ku kudadi di kil ku bo na fala. Na ki ora, kil ku bo pudu na sintidu, bo ta fala, pabia i ka abos ku na fala, ma i Spiritu Santu. ¹²Ermons na ntrega njutru pa e matadu; pape na ntrega si fiju. Fijus na lanta kontra se papes, e pui elis pa e matadu. ¹³Tudu jinti na nfastia bos pabia di mi, ma kil ku fika fiel te na fin i na sedu salbu.”

13.5: Jer 29.8; Ef 5.6; 1 Tes 2.3 **13.9:** Mat 10.17-18

13.11: Mat 10.19-22; Luk 12.11-12; At 4.8,31

13.12: Mik 7.6 **13.13:** Dan 12.12; Apok 2.10

13.14: Dan 9.27; 12.11 **13.16:** Kum 19.17

13.19: Dan 12.1 **13.21:** Luk 21.8 **13.22:** At 20.30

13.23: 2 Ped 3.17 **13.24:** Sof 1.15; Apok 6.12-13

13.26: Kap 14.62; Dan 7.13; Mat 16.27

Garandi sufrimentu

(*Mat 24.15-28; Luk 21.20-24*)

¹⁴(Kin ku lei e palabra, pa i buska ntindil.) “Ora ku bo oja ki ‘nujenti-menti meduñu’ na lugar ki ka dibi di sta nel, kilis ku sta na Judeia pa e kuri pa montis. ¹⁵Kil ku sta riba di kasa pa ka i ria dentru di kasa pa toma kualker kusa di la. ¹⁶Kil ku sta na matu, ka i riba tras pa toma si kapa. ¹⁷Koitadi di preñadas, ku kilis ku na mamanta na ki dias! ¹⁸Bo ora pa ka e kusa kontisi na tempu di cuba, ¹⁹pabia na ki dia i na ten garandi foronta, ku si kolda- di nunca ka ciga di kontisi disna di kumsada di mundu ku Deus kumpu te aos, nin nunca mas i ka na ten suma el. ²⁰Si Siñor ka menusa dias di ki foronta, nin un kriatura bibu ka na pudiba salba, ma, pa amor di si pobu ki kuji, i menusa ki dias.

²¹“Asin, si algin fala bos: ‘Ali Kristu li!’ o ‘Alal la!’ ka bo fia, ²²pabia i na lanta finjiduris ku na fala kuma elis i Kristu, o elis i anunsiaduris; e na fasi sinal ku milagri pa ngana, si e pudi, te kilis ku Deus kuji. ²³Bo toma sintidu; N jumna konta bos tudu e kusas.

Fiju di omi na bin

(*Mat 24.29-31; Luk 21.25-28*)

²⁴“Dipus di ki dias di foronta, sol na bida sukuru, lua ka na da lus; ²⁵strelas na kai di seu; puderis ku sta na seu na bulbulidu. ²⁶Dipus, jinti na oja Fiju di omi na bin na nuven ku garandi puder ku gloria. ²⁷Na ki ora i na manda si anjus pa kuartu kantu di tera pa e junta kilis

ki kuji, desdi un ladu di mundu te na utru.

Lison di figera

(*Mat 24.32-35; Luk 21.29-33*)

²⁸“Bo toma lison di figera. Ora ku si ramu na bida moli, si foja kumsa na nasi, bo ta sibi kuma cuba pertu. ²⁹Asin tambu, ora ku bo oja tudu e kusas na kontisi, bo pudi sibi kuma i sta pertu, mesmu na porta. ³⁰N na konta bos bardadi kuma, e jorson ka na kaba antis di tudu e kusas kontisi. ³¹Seu ku tera na pasa, ma ña palabra ka na pasa.

Ningin ka sibi dia nin ora

(*Mat 24.36-44; Luk 21.34-36*)

³²“Di ki dia ku ora, ningin ka sibi, nin anjus na seu, nin Fiju; son ña Pape ku sibi.

³³“Bo bisia, bo toma sintidu, pabia bo ka sibi ora ku tempu na ciga. ³⁴I suma un omi ku bai bias. I disa kasa na konta di si servus, i da kada kin si tarbaju, i da porteru ordi pa i bisia. ³⁵Abos tambu bo bisia, pabia bo ka sibi kal tempu ku dunu di kasa na bin, si i di tardi, o di noti, o si i ora ku galu na kanta, o parmaña. ³⁶Ora ki bin di repenti, ka i oja bo na durmi. ³⁷Kusa ku N fala bos, N fala pa tudu jinti: ‘Bo bisia.’”

Planu di saserdotis

(*Mat 26.3-5; Luk 22.1-2; Jon 11.45-53*)

14 ¹I faltaba dus dia pa Paskua, ki festival ke ta kumeba pon sin fermentu. Êsifis di saserdoti ku pursoris di lei e na buskaba manera di prindi Jesus sukundidu di

pobu, pa e matal. ²E fala: “I ka dibi di sedu na ora di festival, pa ka pui pobu lanta ku baruju.”

Jesus purfumadu pa nteru

(*Mat 26.6-13; Jon 12.1-8*)

³Jesus staba na Betânia, na kasa di Simon ku teneba mpincu. Oca i sinta na mesa, un minjer yentra ku un jaru kumpudu di un pedra lebi ku ta comadu alabastru, ku teneba dentru del un purfumu puru, karu dimas, kumpudu di un planta ku ta comadu nardu. I kebra jaru pa yabril, i darma purfumu riba di kabesa di Jesus. ⁴Utru jinti ku staba la e paña raiba, e punta ñutru: “Ke ku manda i dana purfumu? ⁵I pudiba bindidu pa mas di ki trizen-tus mueda di prata, pa da koitadis.” E papia risu kontra minjer. ⁶Jesus fala elis: “Bo disal. Pa ke ku bo na kansal? I fasi un bon kusa pa mi. ⁷Sempri bo na tene koitadis ku bos. Bo pudi juda elis ora ku bo misti, ma ami, i ka sempri ku bo na tenen. ⁸El i fasi kil ki pudi. I jumna i pui purfumu na ña kurpu pa ña nteru. ⁹N na konta bos bardadi kuma, na tudu parti di mundu ku Bon Noba na kontadu, kusa ku e minjer fasi i na kontadu tambu, pa si lembransa.”

Falsiamentu di Judas

(*Mat 26.14-16; Luk 22.3-6*)

¹⁰Judas Iskariotis, un di ki dozi disipulu, i bai pa êsifis di saserdoti pa ntrega elis Jesus. ¹¹Oca ke obi ke ki fala, e kontenti, e fala e na dal

13.31: Is 40.8 **13.33:** Mat 25.13-14 **14.3:** Luk 7.37
14.7: Lei 15.11 **14.8:** Kap 16.1; Jon 19.40

diñeru. Judas kumsa montia tempu pa ntrega Jesus.

Ultimu sia di Jesus ku si disipulus

(*Mat 26.17-30; Luk 22.7-23;*

Jon 13.21-30; 1 Kor 11.23-29)

¹²Na purmeru dia di festival di pon sin fermentu, oca judeus na mataba karnelsiñu pa Paskua, disipulus di Jesus puntal nunde ki misti pa e bai purpara sia di Paskua pa e kume. ¹³I manda dus di si disipulus, i fala elis: “Bo bai na prasa; un omi ku karga puti di yagu i na kontra ku bos. Bo bai si tras. ¹⁴Kau ki yentra nel, bo ta fala dunu di kasa: ‘Mestre manda puntau na kal sala ki na kume sia di Paskua nel ku si disipulus.’ ¹⁵I na mostra bos un sala garandi na purmeru andar, tudu pruntu ku mobilia. Bo purpara sia la.” ¹⁶Si disipulus sai, e bai prasa, e oja tudu suma ki fala elis; e purpara sia di Paskua.

¹⁷Oca sol na noti, Jesus ciga ku si dozi disipulu. ¹⁸Oca ke sinta na mesa, e na kume, Jesus fala elis: “N na konta bos bardadi, un di bos ku na kume ku mi i na falsian.” ¹⁹E kumsa na fika tristi. Kada kin na puntal: “Nta i ami, Siñor?” ²⁰Jesus ruspundi, i fala elis: “I un di bos dozi ku na moja pon juntu ku mi na pratu. ²¹Na bardadi, Fiju di omi na muri, suma ku Skritura fala del, ma koitadi di ki omi ku na falsia Fiju di omi! I ta minjor pa ki algin si i ka padiduba.”

²²Oca ke na kume, Jesus toma pon, i fala Deus obrigadu, i kebral,

i da elis, i fala: “Bo toma; es i ña kurpu.” ²³Dipus i toma kopu, i fala Deus obrigadu, i da elis; e bibi nel tudu. ²⁴I fala elis: “Es i ña sangi, sangi di kontratu, ku darmadu pa manga di jinti. ²⁵N na konta bos bardadi, N ka na bibi mas biñu di uva te ki dia ku N na bibi biñu nobu na renu di Deus.”

²⁶Dipus ke kanta kantiga, e sai, e bai pa monti di Olivera.

Pedru avisadu

(*Mat 26.31-35; Luk 22.31-34;*

Jon 13.36-38)

²⁷Jesus fala elis: “Abos tudu bo na disan, pabia i sta skritu kuma Deus fala i na mata bakiadur; karnelis na pajiga. ²⁸Dipus ku N lantandadu di mortu, N na bai bo danti pa Galilea.” ²⁹Pedru ruspundi, i falal: “Nin ku tudu disau, ma ami, nunca N ka na disau.” ³⁰Jesus falal: “N na kontau bardadi, e di noti, antis di galu kanta dus bias, bu na fala tris bias kuma bu ka kunsin.” ³¹Pedru ruspundil ku mas forsa: “Nin ki pirsis pa N muri ku bo, di nin un manera N ka na negau!” Tudu utrus fala tambi asin.

Jesus ora na Jetsemane

(*Mat 26.36-46; Luk 22.39-46; Jon 18.1*)

³²Oca i ciga na un lugar ku comadu Jetsemane, Jesus fala si disipulus: “Bo sinta li nkuantu N na bai ora.” ³³I bai ku Pedru, Tiagu ku Jon. I kumsa na sinti tristesa meduñu. ³⁴I fala elis: “Ña korson sta tristi dimas, kuas pa muri. Bo fika li, bo ba ta bisia.” ³⁵I bai mas danti

14.12: Sai 12.1-36; Sir 23.5 14.27: Zak 13.7

14.28: Kap 16.7 14.34: Jon 12.27

un bokadu, i kai mborkadu na con, i pidi si Pape, si i pudi sedu, pa i libral di ki ora. ³⁶I fala: “Ña Pape, bu pudi tudu. Lunjusi di mi e kopu di sufrimentu, ma i ka na manera ku ami N misti, ma suma ku bu misti.”

³⁷Dipus i riba, i oja disipulus na durmi. I punta Pedru: “Simon, nta bu na durmi? Bu ka pudi fika kordadu, nin si i un ora? ³⁸Bo to ma sintidu, bo ora pa ka bo kai na tentason. Na bardadi, vontadi sta pruntu, ma kurpu i fraku.”

³⁹I bai utru bias pa bai ora; i torna fala mesmu palabra. ⁴⁰I riba mas pa si disipulus, i oja elis mas e na durmi, pabia se uju staba pisadu ku sonu. E ka sibiba nin ke ke na ruspundil.

⁴¹I riba terseru bias, i fala elis: “Bo na durmi inda, bo na diskan sa! I justa! Ora ciga ja. Fiju di omi na ntregadu na mon di omis mau. ⁴²Bo lanta no bai, pabia kil ku na falsian, ali i na bin.”

Jesus prindidu

(*Mat 26.47-56; Luk 22.47-53; Jon 18.2-12*)

⁴³Oca ki na papiaba inda, Judas ciga, ku sedu un di ki dozi disipulu. I bin ku manga di jinti ku teneba spadas ku mandukus. I sêfis di saserdoti ku pursoris di lei ku jinti garandi ku manda elis. ⁴⁴Falsiadur da elis un sinal, i fala elis: “Kil ku bo oja N da bežu, bo ta sibi kuma i el; bo ta prindil, bo lebal suguru.”

⁴⁵I ciga son, i bai pa Jesus, i falal: “Rabi!” i dal bežu. ⁴⁶Ki omis pañal, e bafal risu. ⁴⁷Un di kilis ku staba la busi spada, i da kriadu di sêf di

saserdotis ku el, i sapal oreja. ⁴⁸Jesus fala elis: “Bo bin ku spadas ku mandukus pa prindin, suma un ladron. ⁴⁹Tudu dia N ta sta ku bos na kasa di Deus, N na nsina; bo ka prindin, ma es kontisi pa i sedu suma ku Skritura fala.”

⁵⁰Na ki ora tudu disal, e kuri, ⁵¹ma un rapas ku na sigil, ku kubriba son lensol, oca e misti pañal, ⁵²i larga elis ku lensol, i kuri nun.

Jesus dianti di Konseliu di judeus

(*Mat 26.57-68; Luk 22.63-71;*

Jon 18.13-24)

⁵³Dipus, e leba Jesus pa kasa di sêf di saserdotis; e junta tudu sêfis di saserdoti ku garandis ku pursoris di lei. ⁵⁴Pedru na sigil di lunju, te na baranda di tras di sêf di saserdotis. I sinta la juntu ku guardas, i na kenta na fugu. ⁵⁵Sêfis di saserdoti ku tudu jinti di Konseliu e buska tustumuñu kontra Jesus pa e pudi matal, ma e ka oja, ⁵⁶pabia manga di jinti na lantanda falsu tustumuñu kontra Jesus, ma se palabra ka filaba. ⁵⁷Utrus lanta, e konta mintida kontra el, e fala: ⁵⁸“No obil i fala kuma i na kebra e kasa di Deus li, ku mon di omi kumpu; na tris dia i ta kumpu utru ku ka kumpudu ku mon di omi.” ⁵⁹Nin ku sin, se tustumuñu ka fila.

⁶⁰Sêf di saserdotis lanta na metadi di tribunal, i punta Jesus: “Bu ka tene nada di ruspundi aserka de

14.36: Rom 8.15; Gal 4.6; Eb 5.7 **14.36:** Jon 5.30; 6.38

14.38: Rom 7.18-19; Gal 5.17 **14.41:** Jon 13.1

14.49: Luk 19.47 **14.49:** Is 53; Dan 9.26; Luk 24.44-47

14.50: V 27 **14.53:** Luk 22.54 **14.57:** Sal 35.11

14.58: Kap 15.29; Jon 2.19-21

kusas ke testifika kontra bo?” ⁶¹Jesus kala boka, i ka ruspundi nada. ⁶²Şef di saserdotis torna puntal mas: “Abo i Mesias, Fiju di Deus ku mersi ngabadu?”

⁶²Jesus falal: “Na bardadi ami i el. Bo na oja Fiju di omi sintadu na direita di Deus di puder; bo na ojal i na bin na nuven di seu.” ⁶³Şef di saserdotis rumpi si ropa, i fala: “Pa ke ku no pirsisa inda di tustumuña?”

⁶⁴Bo kaba ja obi kuma ki na lebsi Deus! Ke ku bo oja?” Elis tudu e fala kuma i ten kulpa, i dibi di muri.

⁶⁵Utrus kumsa na kuspi riba del, e tapal uju, e dal suku, e falal: “Suma abo i anunsiadur, diviña!” Guardas tambi dal bofotada.

Pedru nega Jesus

(*Mat 26.69-75; Luk 22.54-62;*

Jon 18.15-18,25-27)

⁶⁶Oca ku Pedru staba bas na baranda di tras, un bajuda di kasa di şef di saserdotis pasa, ⁶⁷i oja Pedru na kenta, i jubil diritu, i falal: “Abo tambi bu staba ku Jesus di Nazaré.”

⁶⁸Pedru nega, i falal: “N ka kunsil, nin N ka ntindi ke ku bu na fala.” I sai fora. Galu kanta. ⁶⁹Ki bajuda ojal mas, i rabida i fala kilis ku staba la: “Es i un delis.” ⁷⁰Ma el i torna nega utru bias.

Mas un bokadu, kilis ku staba la e fala Pedru utru bias: “Sertamenti abo i un delis, pabia abo tambi i di Galileia.” ⁷¹I kumsa na jurmenta ku palabras forti, i fala: “N ka kunsil

ki omi ku bo na papia del.” ⁷²Na ki ora galu kanta sugundu bias. Pedru lembra palabra ku Jesus falalba: “Antis di galu kanta dus bias, bu na fala tris bias kuma bu ka kunsin.” Ki ora i ka pudi nguenta; i kumsa na cora.

Jesus dianti di Pilatus

(*Mat 27.1-2,11-14; Luk 23.1-5;*

Jon 18.28-38)

15 ¹Oca sol na mansi, şefis di saserdoti junta ku garandis ku pursoris di lei ku tudu membrus di Konseliu, pa filanta ke ke dibi di fasi. E mara Jesus ku korenti, e lebal, e ntrega Pilatus. ²Pilatus puntal: “Abo i Rei di judeus?” Jesus ruspundi i falal: “I suma ku Ñu fala.”

³Şefis di saserdoti e na akusalba ku manga di kusa. ⁴Pilatus torna puntal: “Bu ka na ruspundi nada? Jubi kuma ke na fala manga di kusa kontra bo!” ⁵Jesus ka ruspundi mas nada. Pilatus dimira dimas.

Jesus kondenadu pa mortu

(*Mat 27.15-26; Luk 23.13-25;*

Jon 18.39—19.16)

⁶I seduba kustumu, na tempu di festival, pa Pilatus larga un prezu ku pobu pidi. ⁷I staba na kalabus un omi ku comadu Barabás, ku utrus si kumpaņeris bandidu ku mata algin oca ku jinti lanta kontra gubernu. ⁸Multidon di jinti junta, e bai pidi Pilatus pa i fasi elis kil ki kustuma ta fasi. ⁹Pilatus punta elis: “Bo misti pa N larga bos Rei di judeus?” ¹⁰I sibiba kuma şefis di saserdoti ntregal Jesus pabia di nveña.

14.61: Is 53.7 14.62: Mat 16.27 14.70: At 2.7

14.72: V 30 15.1: Sal 2.2; At 4.6 15.1: At 3.13

15.5: Kap 14.61; Jon 19.9

¹¹Şefis di saserdoti cuci pobu pa e pidi pa i larga Barabás mbe di larga Jesus. ¹²Pilatus torna punta elis: “Nta ke ku bo misti pa N fasi ku kil ku bo coma Rei di judeus?” ¹³E ruspundi ku gritu: “Krusifikal!” ¹⁴Pilatus torna punta elis: “Ma kal mal ki fasi?” E torna grita mas risu: “Krusifikal!” ¹⁵Pilatus mistiba pa pobu kontenti ku el; i larga elis Barabás, i manda suta Jesus, i ntregal pa i krusifikadu.

Soldadus fasi Jesus trosa

(Mat 27.27-31; Jon 19.2-3)

¹⁶Soldadus leba Jesus pa dentru di sedi di gubernadur; e coma restu di kompañia di tropas. ¹⁷E bistil kapa burmeju suma rei; e kumpu koroa di fidida, e pul na kabesa. ¹⁸E kumsa na falal manteña: “Viva, Rei di judeus!” ¹⁹E sutal ku kana na kabesa, e kuspi riba del, e finka juju si dianti suma ke na adoral. ²⁰Dipus ke fasil trosa, e tiral ki kapa burmeju, e tormal si ropa, e lebal pa bai krusifikal.

Krusifikason

(Mat 27.32-44; Luk 23.26-43; Jon 19.17-27)

²¹Un omi comadu Simon, di prasa di Sireni, pape di Alşandri ku Rufu, i na pasa oca ki na bin di matu. E obrigal pa i karga krus. ²²E leba Jesus pa lugar comadu Gólgota, ku signifika lugar di Kaku di Kabesa. ²³E dal biñu jagasidu ku utru mesiñu comadu mira, ma i nega tomal. ²⁴Ki ora e krusifikal; e rapati si ropa entri elis; e juga pa jubu ke ku kada kin na leba.

²⁵I seduba novi ora di parmaña oca ki krusifikadu. ²⁶Riba del e skirbi si akusason, ku fala: “REI DI JUDEUS”. ²⁷E krusifika tambu dus bandidu juntu ku el, un na direita, utru na skerda. [²⁸Asin i sedu suma ku Skritura fala: “I kontadu na grupu di jinti ku fasi mal.”]

²⁹Kilis ku na pasa e na kobalba, e na balansa kabesa, e fala: “Yode! Abo ku fala bu na bati kasa di Deus, na tris dia bu ta kumpul mas, ³⁰salba bu kabesa, bu ria na krus!”

³¹Na mesmu manera tambu şefis di saserdoti ku pursoris di lei na trosalba, e na fala ntruu: “I salba utrus, ma i ka pudi salba si kabesa! ³²Suma el i Mesias, Rei di Israel, pa i ria na krus gosi pa no pudi oja, no fia!” Kilis ku krusifikadu ku el e na kobalba tambu.

Mortu di Jesus

(Mat 27.45-56; Luk 23.44-49; Jon 19.28-30)

³³Me-dia, tudu tera bida sukuran te tris ora. ³⁴Na tris ora di tardi Jesus fala ku vos altu: “Eloi, Eloi, lámá sabaktani?” ku sedu: “Ña Deus, ña Deus, pabia di ke ku bu bandonan?” ³⁵Utru di kilis ku stabala ku obil, e fala: “Ali i na coma Elias!” ³⁶Un delis kuri, i pui sponja na vinagri tok i moja yop, i maral na kana, i cigantal na boka di Jesus, i fala: “Pera, no jubi si Elias na bin tiral!” ³⁷Jesus da garandi gritu, i muri.

15.11: At 3.14 **15.24:** Sal 22.18 **15.28:** Is 53.12
15.29: Sal 22.7-8 **15.29:** Kap 14.58 **15.34:** Sal 22.1
15.36: Sal 69.21

³⁸Kurtina di kasa di Deus rumpi dus padas di riba pa bas. ³⁹Kapiton di guarda ku staba dianti di krus i oja kuma ku Jesus grita, i muri; i fala: “Na bardadi, e omi i seduba Fiju di Deus!”

⁴⁰Tambi i staba la utru minjeris ku na jubi di lunju, suma Maria Madalena, Salomé, ku Maria, mame di Tiagusiñu ku José. ⁴¹E minjeris ta kumpaña Jesus, e ta judalba oca i staba na Galileia. I staba la tambi manga di utru minjer ku kumpañoalpa pa Jerusalem.

Nteru di Jesus

(*Mat 27.57-61; Luk 23.50-56; Jon 19.38-42*)

⁴²Oca ku sol na kai, suma i seduba dia di purparason, ku sedu vespera di dia di diskansu, ⁴³José ku bin di Arimateia, un omi rispita-du di Konseliu, ku na peraba renu di Deus, i mara koražen, i bai nunde Pilatus, i pidi kurpu di Jesus. ⁴⁴Pilatus dimira di manera ku Jesus muriba ja. I coma kapiton di guarda, i puntal si i tarda ki muri. ⁴⁵Dipus ki obi konfirmason di kapiton di guarda, i da José lisensa pa i toma kurpu. ⁴⁶José bai kumpra lensol finu, i tira kurpu na krus, i mbuljal na ki lensol, i mitil na un koba ku kobadu na roca, i rola pedra, i tapa boka di koba. ⁴⁷Maria Madalena ku Maria, mame di José, e oja nunde ki nteradu.

Jesus lanta di mortu

(*Mat 28.1-8; Luk 24.1-12; Jon 20.1-10*)

16 ¹Oca dia di diskansu pasa, Maria Madalena, Salomé ku Maria, mame di Tiagu, e kumpra purfumu pa bai unta kurpu di Jesus. ²Na purmeru dia di semana e bai sedu pa koba, oca sol kumsa na lanta. ³Na kamiñu e na punta ntrtru: “Kin ku na rolanu pedra na boka di koba?” ⁴Ma oca e yalsa uju, e rapara kuma ki pedra, ku garanti ba dimas, i tiraduba ja. ⁵E yentra na koba, e oja un rapas sinta na ladu direita; i bisti ropa kumpridu, branku. E panta.

⁶I fala elis: “Ka bo panta. Bo na buska Jesus di Nazaré ku krusifikadu. I lanta; i ka sta li. Ali lugar nunde ke pulba. ⁷Bo bai, bo fala si disipulus, ku Pedru, kuma el i na bai bo dianti pa Galileia. La bo na ojal suma ki falaba bos.”

⁸E sai na koba dipresa, e kuri, pabia e tenba medu ku spantu. E ka fala ningin nada pabia e medi.

Jesus parsi pa Maria Madalena

(*Mat 28.9-10; Jon 20.11-18*)

[⁹Oca ku Jesus lanta di mortu parmaña sedu na purmeru dia di semana, i parsi purmeru pa Maria Madalena, kil ki tira seti dimoniunel. ¹⁰Maria bai konta kilis ku ta yandaba ku Jesus. E staba tristi, e na cora. ¹¹Oca ke obi kuma i sta bibu, kuma Maria ojal, e ka fia.

Jesus parsi pa dus disipulu

¹²Dipus, Jesus parsi ku utru parsensa pa dus delis ku staba na

15.38: Sai 26.31-33; 2 Kron 3.14; Eb 6.19 15.41: Luk 8.2-3
15.43: Luk 2.25,38 16.1: Luk 23.55-56 16.7: Kap 14.28
16.9: Luk 8.2 16.11: Jon 20.14 16.12: Luk 24.13

kamiñu pa bai pa se tabanka. ¹³E bai konta ki utrus, ma e ka fia inda.

Jesus parsi pa si onzi disipulu

(*Mat 28.16-20; Luk 24.36-49;*

Jon 20.19-23; At 1.6-8)

¹⁴Pa kabantada i parsi pa ki onzi, oca e staba na mesa. I kulpa elis pa se falta di fe ku duresa di korson, pabia e ka fia na kilis ku ojal dipus di i lanta di mortu. ¹⁵I fala elis: “Bo bai pa tudu mundu, bo konta Bon Noba pa tudu jinti. ¹⁶Kin ku seta, i batisadu, i na sedu salbu, ma kil ku ka setal i na kon-denadu. ¹⁷E sinal na kumpaña

kilis ku fia: na ña nomi e na tira dimonius na jinti; e na papia nobu linguas; ¹⁸e na pega na kobras; si e bibi kualker kusa ku ta mata, i ka na fasi elis nin danu; e na pui mon riba di duentis; e ta san.”

Jesus subi pa seu

(*Luk 24.50-53; At 1.9-11*)

¹⁹Dipus di Siñor Jesus papia ku elis, i lebadu pa seu, i sinta na mon direita di Deus. ²⁰Disipulus bai, e konta palabra di Deus na tudu parti. Siñor tarbajauntu ku elis, i konfirma se palabra ku milagris ku na kumpañoalba.]

16.14: 1 Kor 15.5 **16.15:** Kol 1.23 **16.16:** Jon 3.18; At 2.38; 16.31; Rom 10.9; 1 Ped 3.21 **16.17:** luk 10.19; At 5.16; 8.7; 16.18; 19.12 **16.17:** At 2.4; 10.46; 19.6; 1 Kor 12.9-10; 28-30 **16.18:** Luk 10.19; At 28.3-5 **16.18:** At 5.15-16; 9.17-18; 28.8; Tia 5.14-15 **16.19:** Luk 24.51; At 1.2,9; 7.55-56 **16.20:** At 5.12; 14.3; 1 Kor 2.4-5; 3.9; Eb 2.4